

ASO LULU, 24 IANUARI 2024

Na nofoia e le Fofoga Fetalai le Nofoa i le itula e 9:30 i le taeao.

FOFOGA FETALAI: Ou te faasilasila atu ua amatalia nei Tualumaga a le Fono Aoaofaitulafono.

Ou te muai faatalofa atu i lenei taeao fou i le paia o le Palemene, i le afio o lau Afioaga i le Taitai o le Malo lau Afioaga i le Tamaitai Palemia, afio lau Afioaga i le Sui Palemia, le afifio o a outou Afioaga i Minisita o le Kapeneta faapea Afioaga i Minisita Lagolago.

Afio foi lau Afioaga i le Taitai o le Itu Agai, tainane lau Afioaga i le Sui Taitai, afifio Taitaifono ma Sui Taitai o Komiti Faa-Palemene ma sui usufono mamalu uma o le Palemene.

Ua fetalai salu i lenei taeao, o ata lafoia ia o le sau o le ola fou ua momoli mai i ai e le Atua lo outou soifua ma so matou ola. O faailoga ia o Lana faaeaea e le motusia mo lo tatou valaauina ua tatou fesilafai i manu ma le olioli. Viia Lona Suafa e faavavau. Faafetai i le Atua i Lona agalelei o lea ua utumatagi i liu o vaa aua le alofaiva o le Maota i lenei aso. Malo le soifua manuia, malo le lagi e mama, faamalo le usu i lenei taeao. Tatou lalafa i le Atua lenei aso e iu ai mea uma i le manuia ma le filemu.

E faatalofa atu foi i le afifio mai o Ofisa Sili o Pulega o Matagaluga ma Faalapotopotoga Tumaoti a le tatou Malo, taeao manuia. Faamalo, faafetai le faamalolosi mai mo le lagolagoina o la tatou galuga.

Samoa ma lau faafofoga tapuai mai i ou tulaga faalaga, e le gata o Samoa nei ae faapea foi i so o se tafa o le kelope, malo le soifua manuia ma le lagi e mama.

O le tatou galuga o lenei aso, ia na o se faamanatu lava a le Nofoa i tatou faauilavea. E manino lava a tatou Tulafono Tumau na review pe na toe iloiloia i le faaiuga o le Paeaiga talu ai; e talosaga i le Nofoa mo se avanoa i se mataupu fia faasao po o se mataupu fia faamalamalama. E le talia e le Nofoa le faauilavea i le isi faauilavea, e manino lava tatou Tulafono Tumau.

O le finagalo manino lea o le Taitai o le Malo po o le Taitai o le Maota ina ia faasao pea saunoaga a sui usufono uma o lo o fia faafogafoga mai i ai nai o latou Itumalo.

Faafetai mo le aso ananafi i le tatou feiloaiga mo le miliona. E talitonu foi ua leai a se vaiiliu e le i oo i ai le tatou felafolafoaiga ananafi. O le a fesoasoani foi i o outou finagalo aemaise foi o avanoa o le Komiti Faatonu ia ma le Komiti galulue lea sa ave i ai a tatou fesili. E talitonu foi mo le faasaoina o le taimi ma le tatou galuga ua manino ia tulaga uma i le tatou miliona.

O le tatalo lava a le Fofoga Fetalai, ia tu taumua i tai sou Lona Agaga e tafatafafuga iai le tofa ma le utaga fetalai. Manuia le usugafono i lenei taeao, manuia lau tapuaiga Samoa.

TUUINA ATU O PEPA

Na tolaulauina e le Failautusi i le Fono Aoao Faitulafono le faasologa o Pepa e tusa ai ma T.T.49(2).

1. P.P.2023/2024 Nu.99, Tali a le Malo i le P.P.2022/2023 Nu.156, Lipoti a le Komiti o le Vaega Tau le Va Fealoai i le P.P.2022/2023 Nu.74, Lipoti Faaletausaga a le Matagaluega o Aoga, Taaloga ma Aganuu mo le Tausaga Faaletupe 2021/2022;
2. P.P.2023/2024 Nu.100, Tali a le Malo i le P.P.2022/2023 Nu.157 Lipoti a le Komiti o le Vaega Tau le Va Fealoai i le P.P.2022/2023 Nu.90, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2021/2022;
3. P.P.2023/2024 Nu.101, Lipoti Faaletausaga a le Ofisa o le Komisi o Faiga Palota mo le Tausaga Faaletupe 2022/2023;
4. P.P.2023/2024 Nu.102, Lipoti Faaletausaga a le Ofisa o le Komisi o le Toe Fuataiga o Tulafono a Samoa mo le Tausaga Faaletupe 2022/2023;
5. P.P.2023/2024 Nu.103, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2022/2023;
6. P.P.2023/2024 Nu.104, Lipoti Faaletausaga a le Falemeli o Samoa mo le Tausaga Faaletupe 2022/2023;
7. P.P.2023/2024 Nu.105, Lipoti Faaletausaga a le Ofisa Tausi Mavaega mo le Tausaga Faaletupe 2022/2023;
8. P.P.2023/2024 Nu.106, Lipoti mo Faiga Palota Laiti mo Itumalo Palota o Faleata 4, Siumu ma Vaa o Fonoti 2023;
9. P.P.2023/2024 Nu.107, Lipoti Faaletausaga a le Auaunaga o Vaa a Samoa mo le Tausaga Faaletupe 2022/2023;
10. P.P.2023/2024 Nu.114, Lipoti Faaletausaga a le Faletupe o le Atiina-A'e o Samoa mo le Tausaga Faaletupe 2022/2023;
11. S.R.2024/1, Tulafono o Teuteuga o le Tulafono o Tau ma Faalavelave Faafuasei 2023 – Faasilasilaga o le Amata Faamamaluina.

Ma le faaaloalo lau Afioga

TULAFONO TAU FAAOFI O LE FAATATAUINA O TUPE FAAOPOPO (NU.1) 2023/2024 - felafolafoaiga faaauau i luga o le faitauga faalua – Aso 2

FOFOGA FETALAI: E tolopo felafolafoaiga i le aso fono ananafi ua maea saunoa le sui usufono mo Safata 1. O le avanoa leni mo se tasi o sui usufono e fia saunoa.

Ia o lea ua fou mai le sa o le sui usufono mai Falelatai ma Samatau, o le avanoa lea o lau afioga.

**Afioga LUPEMATASILA GALUMALEMANA TOLOGATA TOGIA
TILE LEIA (Falelatai & Samatau):** Lau Afioga i le Fofoga Fetalai, o lea ua

maea ona e sisi le atumua o le taeao i le viiga ma le faafetai i le Atua ua mafai foi ona o tatou aulia mai le aso fononua lona lua lenei o le uluai fononua o lenei foi tausaga fou.

E faatalofa atu ma ofo alofa atu i lau Afioga i le Fofoga Fetalai faapea foi le Sui Fofoga Fetalai ma le Failautusi, ia faapea le Ofisa o le Fononua.

E matou te faapai atu foi i lena itu o le Maota, i le afio o lau Afioga i le Tamaitai Palemia, afio lau Afioga i le Sui Palemia, le paia maualuga o alii ma tamaitai Minisita o le Kapeneta faapea foi Afioga i Minisita Lagolago.

Ia, faapea foi le afio atu o lena itu o le malu, le afio o lau Afioga i le Taitai ma le Sui Taitai ma le tatou Vaega Faaupufai o lo o Agaia le Malo.

E matou te faatalofa ma ofo alofa atu i Ofisa Sili o Pulega o Matagaluega ma Faalapotopotoga Tumaoti a le Malo ua mafai ona tatou mafuta i lena taeao. E le gata i lea a o nisi o le mamalu o le atunuu ua mafai ona tatou fononua faatasi i lena taeao fou.

E faapai atu foi i le tapuaiga maualuga a le Afioga i le Faamasino Sili, o Alii ma Tamaitai Faamasino ia faapea foi le Peresetene o Fanua ma Suafa ma le paia maualuga o le Ofisa o le Faamasinoga.

E faatalofa atu foi i le tapuaiga i Le Ao Mamalu o le Malo ma le Masiofo faapea foi le Sui o le Fononua a Sui Tofia ma le Faletua, aemaise o Samoa aoao i Tama ma Aiga o Aiga foi ma a latou Tama, Usoga a Tumua ma Pule Ituau ma Alataua, Aiga i le Tai ma le Vaa o Fonoti. Ia, aemaise o le aufai tatalo, le aufaigaluega totofi, le aufaigaluega paia a le Atua o lo o faanonomanu aua se manuia o le tatou atunuu.

E faatalofa atu foi i si ou Itumalo o Falelatai ma Samatau ia faapea le nofo a faafeagaiga e fia o si o tatou Itumalo, malo le lagi e mama ma le soifua manuia.

Ae ua ou tulai atu i le ava tele ma le migao e tata ai, e fia fai foi se sao o lena Itumalo aua le talanoaina o le Tala Faatatau Faaopoopo o le Tupe (Nu.1) 2023/2024 e pei ona i luma o le Palemene i lena taeao.

Lau Afioga i le Fofoga Fetalai e amata se tala i le momoli atu o faamalo i le Afioga i le Minisita o Tupe faapea foi le Matagaluega ma Matagaluega uma ma Faalapotopotoga a le Malo sa galulue mo le tapenaina o lena Tala Faatatau Faaopoopo (Nu.1) o le Tupe.

E amata sa matou tala i manaoga o lena Itumalo. Na ona toe faamanatu atu a o lena ua i ina le talosaga a lena Itumalo i ona auala galue, o le auala laupapa ae le gata i lea o le alatele. E pei ona i ai lena vaitau ina ua pau foi timuga i le faaiuga o lena tausaga ma le amataga o lena tausaga, ua tele lava se faaletonu o aualatele ua i ai i le taimi nei. E faapea foi le Falemai. O talosaga uma na lena Itumalo, lena ua i ina ae na ona faamanatu atu.

E avatu le faafesili i le Afioga i le Minisita o Faatoaga, ua leva ona talosaga lena Itumalo i se avanoa e mafai ai ona fai se Talomua poo se Uluai Seleselega. E pei ona silafia o le tolu lena o tausaga o faagasolo lena polokalame taua a le Malo ae le i oo atu lava le faasoa a le Malo i lena Itumalo. Ae tasi lena Itumalo e ese le malosia, e tua i ai le atunuu i le fofoga taumafa. E le gata i totonu o le atunuu ae faapea foi le auina atu i maketi i fafo. O le mea lea na ona toe faamanatu atu i lau Afioga i le Minisita, e le i tau ane lava le tofa i lau faasoa. O lo o talitali pea lena Itumalo i se taimi e oo atu ai le faasologa. Afai o lea ua

lua tausaga ia ua misi ai lenei Itumalo, o lona uiga e tataua ona faa-fa ona fai le uluai seleselega a lenei Itumalo mo lenei tausaga faaletupe ua amatalia.

Ona ou oo mai lea i le talosaga i Sui Tamaitai...

Susuga Hon Laauli Leuatea Polataivao Fosi (Minisita mo Faatoaga ma Faigafaiva): Lau Afioga i le Fofoga Fetalai, pe maua se avanoa meamanu e le i se'e ese le saunoaga a le sui usufono mamalu...

FOFOGA FETALAI: Ia, malie lau afioga i le sui usufono mamalu leaga o lea ua taua le Minisita o Faatoaga.

Ia tuu atu le avanoa i lau Afioga i le Minisita.

Susuga Hon Laauli Leuatea Polataivao Fosi: E faatalofa atu i lau Afioga i le Fofoga Fetalai ma le mamalu o le Palemene. E faatalofa atu foi i le faafofoga a Samoa o lo o tapuai mai i maota ma laoa ia po o fea lava le tafa o le lalolagi. Faafetai i le Atua ua tatou toe aulia lenei aso faaopoopo o le tatou fonotaga. A o le faafesili lau Afioga i le sui usufono mamalu, e le pulea atua e le Matagaluega le tofa a le Itumalo. E te faaoo mai le aso, taimi, e fai ai la outou Uluai Seleselega, o le faamaninoga lena o le ta mataupu. Afai loa ua e finagalo e fai taeao lau Uluai Seleselega, fai loa. Ua uma ona faataatia alafua e pasia ai le \$500,000 a le tatou Matagaluega lea e faasolo atu ai i tua le tatou Uluai Seleselega.

E na ona ou faamanatu atu ua leva ona ou faatali e aveatu lau tusi e faailoa ai le aso ma le taimi e te finagalo e fai ai lau uluai seleselega. Ia, o si au faamanatu lea, ne i te i ua e sa'i mai ia te au ii ae le o faia lou tiute o le logo atu o le Ofisa Sili o Pulega ma le Matagaluega ia ona faatino loa lea o le tatou Uluai Seleselega ae ua matou sauni. Ma le agaga faaloalo.

FOFOGA FETALAI: Malo saunoa i lau Afioga i le Minisita ua manino lea mataupu. Lau afioga i le sui usufono mamalu faaauau mai le saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau afioga i le Minisita. Leaga o la e faalogologo mai si ou Itumalo. O lena foi na toe avatu i le Aso Gafua le isi tusi e faamanatu atu ai le isi tusi, ne i te i ua ta fetaa'i ma lau afioga i le Minisita, a o le agaga faafetai o lea ua maua atu. Atonu o se aso o lenei vaiaso o le a ta felogonai ai, ia ae mo le silafia i le faalogologo mai a si ou Itumalo ua tele tusi na ua tuuina atu i lau Afioga ma le Ofisa.

Ia ona ou mei ese lea i le...

Susuga Hon Laauli Leuatea Polataivao Fosi: Lau afioga....

FOFOGA FETALAI: Lau afioga leaga e faamanino pea le tulaga lea lau afioga i le sui usufono mamalu.

Se i tulai mai lau afioga i le Minisita.

Susuga Hon Laauli Leuatea Polataivao Fosi: Se o la e faafofoga.. o lea foi e i i le Ofisa Sili o Pulega. Ana i ai se tusi ua leva ona fai lau uluai seleselega. E le i avatua se tusi. A o le agaga lena, afai e le o lena tatou o loa e faatino pe a faapea ua e malie e tau atu le aso ma le taimi e fai ai ma le mea e fai ai.

FOFOGA FETALAI: O lea ua manino le finagalo o le Minisita lau afioga i le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Ia faafetai, o le a ou laa ese o le mea sili lea ua talia le talosaga a lenei Itumalo e ui ina tuai.

Ona ou oo mai lea i le Matagaluega o Tina ma Tamaitai, o lenei Itumalo o se tasi o Itumalo e ese le tele. O si o matou pitonuu o Matautu e lua Pulenuu ae tasi le Sui Tamaitai, ua leva ona tatalo atu i le Matagaluega pe tefa le tauala i le Afioga i le Minisita ma le Matagaluega, ua moomia ona tofia ma approve aloaia se Sui Tamaitai mo le pitonuu o Falevai. E silafia foi o le pitonuu lea o Falevai ma Matamatanononofo o lo o afio ma e'e ai Le Ao Mamalu o le Malo. O le taimi nei na o le Tofi Pulenuu ae le o i ai se Sui Tamaitai, o lena ua uma foi ona tuuina atu le talosaga tusitusia, ia se i silasila ane i ai lau afioga i le Minisita.

O le lona lua, o le Sui Tamaitai o le pitonuu o Pata Falelatai o lo o i ai se to'a o lo o i ai i le taimi nei. E talu lava ona amata mai lenei Paeaiga e le o faaaogaina pe le o aloaia foi le Sui Tamaitai o lenei pitonuu, ai ona ua le usitaia aiaiga o le \$6,000 foi lea sa tuuina atu i se vaitau o le 2021 mo le faaleleia o Fale Komiti. Ae silafia foi, o nuu i tua, e tasi lea vaivaiga, e le faapea e le o faaaogaina tatau le tupe, ae ona ua le maua lisiti e pei ona tapa e le tatou Ofisa. O le mea lea e tatalo atu ai. Afai foi ua i ai se sasi o lenei pitonuu i le le mulimulitaia o taiala a le tatou Matagaluega ia alo i luma le tatou sa ona e tele vaega o lo o moomia ai le Sui Tamaitai o lenei pitonuu ae peitai e le o mafai ona faatino ona e le o aloaia le tulaga o lo o i ai i le taimi nei.

Ona ou oo mai lea i le Paketi, e tele taunuuga lelei ma matatia pei ona maua i le folasaga a le Afioga i le Minisita, e \$1.14 piliona le tatou Tupe Faaagaaga mo fefaatauaiga i atunuu i fafo, tusa lea ma le 11.5 masina. Ui i lea, e le mafai ona fesoasoani lenei foreign reserve po o le tupe faaagaaga mo fefaatauaiga i fafo e faatupe ai le tatou Paketi e pei ona faagasolo nei.

O le isi itu taua i le vaega lea, talu ai ona o le pau o le value o le tatou tala (\$) ia faapea foi ma le maualuga o le tau o le soifuaga, e le mafai ai ona ausia le tulaga maualuga e tatau ona i ai masina faaagaaga mo fefaatauaiga i atunuu i fafo.

O le isi itu mo le silafia, sa tatou alalaga i le tausaga na te'a nei ina ua oo i le piliona le tatou Paketi. O lenei foi la ua aumai le isi Tala Faaopoopo, o lona uiga ua sili atu i le piliona le tatou Paketi i le taimi lenei. A o le reality lea e i ai, ona o le taugata o le tau o le soifuaga e le mafai ai ona tutusa le value o le Paketi ma lona faatinoina. Ioe. Faatasi ai ma le value o le tatou tala (\$), e pei o nai vaega ia o lea e tulimatai. E fai foi o le tatou fiafia i le telē o le tatou Paketi ua i ai nei ae pei o se vaai lena a lenei Itumalo. E le o tutusa le value o le Paketi

ma lona faatinoina ona o le tulaga e pei ona taumafai atu i ai, o le taugata o le tau o le soifuaga.

Ae tasi lea luitau tele lava, lea e tuu atu i lau Afioga i le Minisita ma le tatou Malo po o a ni faiga faavae e mafai ai ona tatou foia le faafitauli lea. Aua o le tali masani a lea e tuu mai, e le gata i le tatou Faigamalo iinei ae faapena foi faigamalo i fafo. O lo o tautata lava i le taua o lo o fai a Rusia ma Ukraine, ia faapea foi Isaraelu, e tuuaina i ai le tau o le soifuaga o lo o i ai nei. Ae tatau lava ona tatou galulue tatou o a ni auala e mafai ai ona maua se faamama avega mo le mamalu o le tatou atunuu.

Faafetai o lea ua maua atu o lea ua maua se pau o le tau o le suauu, ae tasi lea auala taua e fesoasoani i le tau o le soifuaga. O le tatalo a lenei Itumalo ia faaauau pea ona pau le tau o le suauu aemaise lava e tatau ona fai se special price mo le Faalapotopotoga o le EPC e gaosi ai le eletise. Aua o lou talitonuga o le eletise o le backbone lea o le development o le atunuu, e faalagolago i ai pisinisi, aiga ma so o se mea. Afai e pau le tau o le suauu, e pass on le penefiti lena e le gata i pisinisi ae faapea foi le mamalu lautele o le atunuu. O le tuualalo lena a lenei Itumalo, i ni faiga e mafai ona tatou galulue ai tatou e foia ai le maualuga o le tau o le soifuaga lea e i ai.

O le isi vaega e tatau ona silasila i ai le Malo e tuu atu ai pea se tuualalo, o tiute ma lafoga o meataumafa i aso uma. O le moa, o le alaisa, o le falaoamata, mea e faalagolago ma soifua ai le atunuu i aso uma. E mafai lava ona fai se faamamaavega, aveese le tiute ma le VAGST ona maua lea o se faamamaavega mo le mamalu o le atunuu.

O le mea lea e matau e lenei Itumalo, afai o lea e alu i luga le tau o le soifuaga i fafo, e faapoopo loa i ai ma le tiute ma le VAGST a tatou iinei ua atili ai ona tele le revenue lea e koleti e le Malo mai le tiute ma le lafoga o le VAGST. Ae o se matou tuualalo i le Malo, se i silasila i nai vaega ia aua e taua.

O le isi vaega e fia avatu ai se tuualalo a lenei Itumalo, se i silasila ane lau Afioga i le Minisita, i tausaga e lua ua tuanai, ia o lea foi e mataitu le faagasologa o lenei tausaga faaletupe e faagasolo. O le mea lava lenei o le rollover. A le uma ona faaaoga tupe i lea tausaga ae fai mai e rollover i le isi tausaga. A o le manatu o lenei Itumalo e tusa ai ma faiga faavae ma le Tulafono, a le maea ona faaaoga se tupe i lea tausaga e tatau lava ona toe aumai i totonu o le Palemene. Aua e leai se isi pule i tua atu o le Palemene lenei e mafai ona latou faatagaina se rollover o se tupe ua le uma ona faaaoga i le taimi na avatu e faaaoga ai.

O le faiga masani a le aufaigaluega a le Malo, a latalata ina o le a uma le financial year e le i uma tupe, e taumafai lava e faaaoga ia uma, aua a le uma latou te le toe maua tupe na, e toe faafoi mai i totonu i le Palemene e toe avatu ai le faatagaga po o fea le isi mea e faaaoga i ai. Ae pei e fou lata faalogo i lea mea o le rollover, e rollover i tua i o ae le aumaia i totonu o le Palemene. Na o le Palemene lenei e mafai ona avatu ai se faatagaga o se toe faaauau ona faaaoga se seleni ua le maea ona faaaoga.

Ona ou oo mai lea i le Faalapotopotoga o le Malosiaga Tau Eletise, e momoli atu le faamalo ma le faafetai i le afioga i le Minisita. E avatu foi faamanuiaga mo le toe tofia o le afioga i le alii Pule Sili o lo o i ai i le taimi nei, ia o ou mama

na. E vaai lava ma le alofa i le tele o le avega o lo o e tauaveina aemaise o le Pulega Komiti Faatonu ma le aufaigaluega i le tulaga mafatia ua i ai le tatou Faalapotopotoga i lenei taimi. O le fesili, o ai e faapalenia le gau tele o le EPC lea ua i ai i le taimi nei? Sa manatu ai a aumai se faaopoopoga i le Tala o le Tupe Faaopoopo lea e fai nei e tau faatumu ai le gau a le EPC lea e i ai. Ae peitai o lea e matau atu i le Tala Faatatau o le Tupe, toeitiiti \$24 miliona lea e totogi e le EPC i le Malo mo ana nonogatupe lea e faatino ai ana atinae. Ou te le iloa la po o fea e o i ai le Faalapotopotoga e aumai ai le tupe lea, a o lea e gau i le taimi nei.

O le mea lea e avatu ai le tuualalo i le tatou Malo. Sa avatu lava le fautuaga i le amataga, e le o se fautuaga e leaga ai le Malo a o le fautuaga mai le loto mama ma le agaga e fia fesoasoani i le pitolaau a le Malo. A outou maitau mai ou te le o toe fai atu lava i le tau o le eletise i le lua tausaga lea ua uma. A o lea la ua toe fai atu se tala i le taimi lenei ona o le faigata o le tulaga lea ua i ai. O lea ua sii le tau o le eletise i le taimi lenei. Ae ou te manatu e le o le tau lea e tatau ona sii i ai, ina ia vave ona toe recover mai le gau tele lea e i ai i le taimi nei. Ae tatau i le Malo ona se i silasila totoa po o le a se faiga e mafai ona fesoasoani ai i le faafitauli o lo o tulai mai.

Faafetai o lea ua vaai atu i le Tala Faaopoopo o le Tupe, o lea...

FOFOGA FETALAI: Ia malie le sui usufono mamalu o lea e matau atu o lea e fia tulai mai le Afioga i le Minisita o Galuega Tetele, ia ua fetau foi le faauilavea ua fia faamalamalama mataupu.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese): Faafetai i lau Afioga i le Fofoga Fetalai, ou te faafetai atu foi i le finagalo faaalua o le Afioga i le sui usufono. O lea ou te tau tomanatu ma ou mafaufau po o fea tonu le tulaga lea ua agai i ai i le gau a le EPC. Ae o le a faamuamua atu sau faamatalaga i le siitia o le eletise lea e pei ona saunoa i ai le afioga i le sui usufono mamalu, e leai se siitaga ua faia. Ina ua taunuu mai le Faigamalo nei i le 2021 ona i ai loa lea o le fuafuaga foi lea o le a fai se stimulus package mo le atunuu i le faapauina lea o le tau o le eletise e 20% i le vaega lea a le domestics po o aiga ma le tulaga o pisinisi ma le tatou Malo, ia ona alu ai lea aua e lua tausaga lea na tuu i ai le fuafuaga lena a uma, e toe faafoi lea i le tau sao o le eletise na i ai. Peitai ina ua uma le lua tausaga, ona i ai loa lea o le fuafuaga a le Kapeneta o le a toe faafoi na o pisinisi ma Matagaluega a le Malo, ae tumau ai pea le 20% lea mo le mamalu o le tatou atunuu lea la e i ai lava i le taimi nei.

O le tulaga foi e tatau ona manino leaga ua tele faamatalaga feaveaveai i lea mea faapea ua faasea le aufaipisinisi. Ae manatua foil au Afioga i le Fofoga Fetalai ma le mamalu o le Maota, na o pisinisi lava a le aufaipisinisi lea e i ai le tulaga o le toe faafoi o le 20% lea po o le toe aveeseina o le 20% ae o lo o i ai lava o latou maota ma laoa i tua, o la e la e penefiti i le 20% lea ua le toe faafoia i tua i aiga i maota ma laoa o le atunuu.

O le tulaga lea lau Afioga i le Fofoga Fetalai pei ona saunoa le sui usufono ua gau le EPC. Ua leva lava ona gau le EPC i le taimi lena a o pulea foi e lana

afioga le tatou EPC. O le taimi lenei ua matua... ua faasolosolo lava ina tulai mai ma toe recover uma mea ia. O le a ou avatu se faataitaiga lau Afioga i le Fofoga Fetalai. O le isi gau tele lava a le EPC sa i ai, manatua foi mea o tatou IPP po o kamupani foi nei latou te fauina mea o solar, e i ai la solar na o lea ua sefulu ma ona tupu tausaga o faatau mai e le EPC le latou power i le 75sene. O le taimi lea i le tausaga na tea nei, toetiiti lava \$1, e 99sene e faatau mai ai e le EPC le power mai lenei solar company. A o le faatauina la e le EPC o le solar i le atunuu, e maualalo lava sa 63sene. O lona uiga o le gau tele lava lenei ua leva ona tauave mai e le EPC i lenei taimi, o fefaatauaiga ia.

O le isi foi vaega na ou tilotilo foi au ina ua ou taunuu mai e fai lava si tele tele o le gau, e le i lava tapena foi le EPC i lenei taimi i le faiga o afi ma mea faapena. Ou te taunuu mai lea o le a savalia le 10 tausaga o faaoga lava e le EPC le afi hire mai Niu Sila. E matautia le tau o lenei foi hire i le masina. O lea la i le taimi nei o lea ua taunuu mai tatou afi e fa i le taimi nei, ou te iloa o lea ua taunuu mai tatou fanua, e ave ai la le isi afi e sui ai le isi afi la e i Savaii, la e oo mai lava i le taimi lenei o la e suetupe ai le isi atunuu o le mea na aumai.

E pei la o tulaga ia lau Afioga i le Fofoga Fetalai aua e le logomalie foi le saunoaga a le sui usufono mamalu a o faafogafoga le aufaigaluega i le latou tautiga e galulue, a o lea pei e foliga mai a tau atu le upu gau, o lona uiga e leai se latou galuega o fai, latou te le iloa foi faatino ni galuega ina ia polofiti le EPC.

E faamalulu atu ai i lau Afioga i le sui usufono mamalu o le tatou galuega e tatou te galulue faatasi, ou te iloa foi e i ai lou tomai faapitoa i le tulaga o mea tau eletise ma mea faapena. Ia, a faapea ua sasi po ua lape foi lenei taimi, ia fesoasoani mai, po o le a sau fautuaga e fautuaina ai le tatou Pulega o Eletise, a o le tulaga lava ia, o la e faatoa amata ona faaoga lelei le tomai o le aufaigaluega a le EPC ina ua ou tuua i ai e fai latou, tatala mai le latou atamamai ma le latou silafia e faatino ai mea ae aua ne i taumafai foi lele e fai atu e se tagata se toatasi po o se lua le control ina o latou galuega o lo o fai.

E pei o le tali atu lea lau Afioga i le Fofoga Fetalai.

FOFOGA FETALAI: Malo faafetai. Atonu ua manino le faamalamalamaga a le Malo i le tulaga lea lau Afioga i le sui usufono mamalu, ia ma o le faamalamalamaga lava lenei o le mataupu pei ona e laga maia. Ou te talitonu foi ua malamalama lou finagalo lau Afioga i le sui usufono mamalu. Toe tolu minute o le sui usufono.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai mo le faasaoina o le taimi o le sui usufono mamalu o lo o saunoa. O lau faauilavea i le sui usufono mamalu.

FOFOGA FETALAI: Ia, agai i le sui usufono mamalu.

Tofa Hon Lauofo Fonotoe Nuafesili Pierre Lauofo: Ioe, o lau fesili aua o lea ua taua o ia lea sa pulea foi le tatou EPC i le taimi ua tuanai, o lona uiga e tele lona silafia i le tulaga o i ai le EPC. A o lau fesili i lau Afioga i le taimi na

e tuua ai le galuega ua tofia oe e avea ma sui usufono, e sao le tala na ou maua sa i ai le \$60 miliona o savings a le EPC a o le taimi nei o lea la ua e saunoa ua leai. O au e te i atu, te i atu lau faalogo i lau saunoaga i lenei taeao. Po o fea la o i ai le \$60 miliona lea sa i ai savings, a o le solar foi la lea kamupani e taua aua o la e sa galue ai lau Afioga i le sui usufono mamalu. O lau fesili, e le o le solar kamupani lena a le Green Power foi lea e i ai shares o le Minisita lea? E le o lena? Se i faamalamalama mai lava faamolemole le tulaga lea, aua o lea e fia malamalama ma silafia e le Maota. O la e foi e faafofoga mai Samoa. O le 20% o lea la ua tuu le 20% e totogi e le kamupani. O le a la le autu o lau saunoaga? Ua aafia tupe faasili po o polofiti a le kamupani ua faasolo ina faaletonu? Ae ua leai foi ni galuega, na o le tutu o masini, leai ni galuega e faaoga ai meafaigaluega, ua le iloa e nai kamupani ma nai pisinisi pe faapefea ona totogi le 20% lea. Ia pei o fesili ia se i fesoasoani mai ai lau Afioga i le sui usufono mamalu, faamolemole. Faafetai.

FOFOGA FETALAI: Ia, o lea ua maua le finagalo o le faauilavea. Ia, a o le i tali mai le sui usufono mamalu, ia leaga o lea ua taua le... e le i oo lava sau saunoaga i lea \$60 miliona, a o lea ua lagalaga atu e le Sui Taitai. Se i tuu atu le avanoa i lau Afioga i le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. E manatu o le a le faatauta i le saunoaga a le Afioga i le Minisita, a o le tulaga tonu lava lea o lea sa ou tau faamalamalama atu. Ou te tuua le galuega i le EPC e latalata i le \$60 miliona le accumulated profit. O le taimi lenei, ua matua leai ma se mea e tasi o totoe ua le gata e leai se mea o totoe, a ua faasolo i tua i le negative, e faitau fia sefulu miliona le negative la ua i ai. E pei o nai mea ia o lea e tau lagalaga ai manatu, ona o le vaai alofa i le faalapotopotoga.

Tofa Hon Olo Fiti Afoa Vaai: Lau Afioga i le Fofoga Fetalai o le mea e fia faasao.

FOFOGA FETALAI: Ia, se i tulai mai le Afioga i le Minisita leaga o lea ua... e lelei lava le faamalamalama o le Maota.

Tofa Hon Olo Fiti Afoa Vaai: O le self-insurance lena a le EPC lea e talanoa mai ai. O le taimi la lena o la e sa galue le Afioga i le sui usufono o lana ia lena fuainumera o le \$60 miliona. A o le mea lea sa ou tau atu i ai e \$35 miliona. E fetautu tonu lava ma le vaitaimi o le Koviti-19 lau Afioga i le Fofoga Fetalai, lea sa faaaluina ai nisi o vaega o seleni. O le taimi lenei o la e ua uma ona toe recover uma.

E mafua ona tulai mai le vaega lena, i le taimi o le faigamalo le la, masalo toetiiti 20 tausaga e le i avea le...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, malie lava lou finagalo o lau fesili o lea na agai i le sui usufono lea e saunoa, ae lelei le tali mai pea o le sui usufono aua o ia lea e ona le saunoaga.

FOFOGA FETALAI: Onosai mai, onosai mai se i faaauau pea le saunoaga a le Minisita. Leaga o lea ua... Ia...

Tofa Hon Olo Fiti Afoa Vaai: O lea ou te tali atu i o i le saunoaga a le sui usufono. Ia o le taimi la lena ou te sau, e 20+ tausaga e le i faafoia e le Malo le tax return a le EPC, lena e \$23 miliona. O lea la faatoa amata ona toe ave i ai e le tatou faigamalo lena. O lea ua uma ona apply mai le EPC se i totogi atu tax ia e i i se i fai ai latou galuega, o lea la ua ave i le taimi nei.

O le tulaga la lena lau Afioga i le Fofoga Fetalai o lea e tau tulituli atu, e faamanino atu vaega ia e le tataua ona toe oo tele i ai se saunoaga. Ia tailo i ai ia outou? Ae a oo loa ina ou talatalaga totonu o le EPC, ia ona outou silafia loa lea o le faaletonu na i ai. O lea la ua uma ona ou tago toe auli uma atu nai maanuminumi ia na i i, a o la e tetele lava tagamea, vaeatu lau Afioga ma le faafofoga a le atunuu ma le Maota, o la e tetele lava isi tagamea o la e faasolo i le masini tamea. Ma lou faaloalo.

FOFOGA FETALAI: Ia, ua i ai foi le manatu o le Nofoa o lea ua manino ia tulaga, ma o le tali lava a le Malo, o le tali mulimuli lena i le Maota. O le mea lea, ua manatu foi le Nofoa... o lea ua tali manino le faigamalo.

Susuga Hon Tuilaepa Fatialofa Auelua Sailele Malielegaoui (Taitai o le Itu Agai): Lau Afioga i le Fofoga Fetalai, ou te talosagaina lau Afioga.

FOFOGA FETALAI: Le Taitai o le Itu Agai faatali o lea e fai le tala a le Fofoga Fetalai.

Susuga Hon Tuilaepa Fatialofa Auelua Sailele Malielegaoui: O lea ou te talosagaina lau Afioga, e le o sao lau faaiuga lea e aumai nei.

FOFOGA FETALAI: Leai, o lea ua fai atu le tala a le Nofoa.

Susuga Hon Tuilaepa Fatialofa Auelua Sailele Malielegaoui: O lea e ave le fesili i i le sui usufono a matou.

FOFOGA FETALAI: Alaala i lalo o lea ua tali mai le sui usufono.

Susuga Hon Tuilaepa Fatialofa Auelua Sailele Malielegaoui: O lea o le a ou alaala i lalo. Ae ou te manao ia silasila mai le atunuu i lau faaiuga lea ua fai.

FOFOGA FETALAI: Ia, o lea lava e alu i tatou Tulafono Tumau. E manatu foi, le sui usufono mamalu, o lea ua manino le tali a le Malo, ia ma o le tali mulimuli lava lea. Sa tulai mai foi le faigamalo, ia o le tulaga lava lena e tasi.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e i ai lava le mea lea ou te fia fesili atu ai i lau Afioga...

FOFOGA FETALAI: E le mafai foi ona e fesiligia le Fofoga Fetalai.

Susuga Hon Tuilaepa Fatialofa Auelua Sailele Malielegaoi: O lea ou te fia fesili atu mo le faamalamalamaga.

FOFOGA FETALAI: Alaala mai lalo, alaala mai lalo.

Susuga Hon Tuilaepa Fatialofa Auelua Sailele Malielegaoi: O lea ou te fesili atu mo le faamalamalamaga, o lea ou te fia malamalama. O lea sa avatu le fesili e ave i le sui usufono lea e saunoa nei, le sa avea ma Pule Sili e fia malamalama ai se i aumai sana faamatalaga, a o lea ua e taofia, o lea ua e taofia.

FOFOGA FETALAI: A lea ua uama ona fai mai lana tala, lea ua uma ona fai mai lana faamatalaga. Alaala mai lalo, alaala mai lalo.

Susuga Hon Tuilaepa Fatialofa Auelua Sailele Malielegaoi: O lea o le a ou alaala i lalo, ae ou te manao ia silafia e le atunuu lau faaiuga lea ua fai.

FOFOGA FETALAI: Ia, alaala mai lalo, alaala mai lalo. Ia, ua manatu foi le Nofoa, ua maea ai i i le taimi o le sui usufono, o lea foi ua manino o lea ua tali le Malo, ia, o le agaga lena. O lea foi ua faailoa mai o lea ua tali le fesili a le Sui Taitai o le Itu Agai. Ou te talitonu foi o lea ua tali manino mai le Minisita, ia o le taunuuga lena o le tatou mataupu.

O le mea lea lau Afioga i le sui usufono mamalu, o le tulaga lena o lau saunoaga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ou te le toe talia le tulai mai o lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Mo faamaumauga a le Maota, mo faamaumauga a le Maota.

FOFOGA FETALAI: Alaala mai lalo. Alaala mai lalo.

Tofa Hon Lauofo Fonotoe Nuafesili Pierre Lauofo: E le i talia e le sui usufono lau fesili, ae ua ou malie ua lava foi lea, e ui lava e le i faamalieina, ae ua lava lea.

FOFOGA FETALAI: Alaala mai lalo. Ia, lau Afioga i le sui usufono mamalu, ia o lea ua avatu i le fautuaga a le Fofoga Fetalai.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai pe maua lava se avanoa?

FOFOGA FETALAI: Ia se i tulai mai lau Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: Ioe, e manatu atu lava i le faafofoga mai a Samoa ma le maimoa a le Palemene i lenei taeao i nei tulaga ua tatou oo i ai. Se mata e o maasiasi lenei mea o le le ava atu i lau Afioga i le Fofoga Fetalai. E le i fua ea se tapu? O a ea nei mea tou te tulai atu lava tou le migao i le Fofoga Fetalai a o lea e tapuai le Palemene?

Susuga Hon Tuilaepa Fatialofa Auelua Sailele Malielegaoui: Lau afioga i le Fofoga Fetalai o se mea e fia faasao...

FOFOGA FETALAI: Lau Afioga i le Taitai o le Itu Agai, alaala mai lalo se i maea le saunoaga a le Minisita.

Susuga Hon Laauli Leuatea Polataivao Fosi: O le a fai soo le le migao. O le a le mea tou te le mafaufau soo ai lea e fai le Fono a le Palemene? O ai tatou te faaaloalo i ai? O le Fofoga Fetalai o le Maota, a o le a fai pea lenei mea... A fai sasao loa tatou upu, sa le tatau ona e i i, sa le tatau ona e saofai i le Fono lenei.

FOFOGA FETALAI: Ia, e faamalulu atu i lau Afioga i le Minisita.

Susuga Hon Laauli Leuatea Polataivao Fosi: E te le silasila i mea ua uma na tupu, ua uma ona e soli le Tulafono.

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai... e sili atu i lau Afioga...

FOFOGA FETALAI: E i ai le agaga o le Nofoa... Ia se i onosai mai, onosai mai se i fai atu le tala a le Nofoa. E tele lava le alofa, e tele foi le ava. E manatu atu o tatou o Taitai o le atunuu tatou te faia se felafolafoaiga e fia faafofoga i ai le atunuu. Ae a tatou o loa i tulaga faapea e fia saunoa ma tulai mai, o le agaga lena. Ua uma ona ou faamanatu atu tatou Tulafono Tumau i le taeao ua sola. E le o ni Tulafono Tumau na faia e le faigamalo o i ai nei, o Tulafono Tumau na faia e lena itu o le Maota.

O le ala foi lena o lea ou te taumafai atu ai, e leai lava se avanoa o se isi tagata e faauilavea, seiavagana e tele le avanoa o le faigamalo e tatau ona faamalamalama se mea. A o lea lava ou te alofa atu lau Afioga i le Taitai o le Itu Agai ma le Sui Taitai, ia lua alofagia foi le Nofoa ma le taumafaiga o le galuega. O lea lava e malamalamagia le finagalo o le sui usufono mamalu, o

lea foi ua tali le Malo, ia sa faapena foi outou taimi, o le tali mulimuli lava o le tali a le Malo o lena. O a nisi mea i tua atu, o la e avanoa tua e faapena ona fesootai i ai, a o totonu lava o le Maota, tatou o i Tulafono ma tatou o i mea sasao, leaga ou te ava atu, ou te alofa atu ia te outou ua outou matutua, a ia outou alofagia foi le Fofoga Fetalai. E filemu filemu lava le Fofoga Fetalai ae a oo foi ina le fiafia, ia ona oo foi lea i nisi tulaga. Ae ou te le manao i le mea lena, leaga o la e faafogafoga mai le atunuu, ua silafia e le atunuu le tiute o le Fofoga Fetalai ia maua le filemu, maua le toamalie o le Maota. A o mataupu ia, o mataupu lava e faapena, a o le tali mulimuli lava o le Malo. A fia malamalama umi se sui usufono, o la e avanoa le faigamalo, a o totonu lava ia o le Maota, tatou o i Tulafono Tumau a le Maota.

Lau Afioga i le sui usufono mamalu, ia ou te talitonu foi o lea ua faamalieina lou finagalo i le faaiuga a le Fofoga. Se i tulai mai e faauma mai lau saunaoga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. E ui lava ina lagona foi le faanoanoa o lena sui usufono ona ua fao uma le taimi ae momoli atu le agaga faafetai. E leai se manatu e faatauta ma le Afioga i le Minisita po o le Malo pei ona saunoa lau Afioga. O le tali lava e aumai o le tali lena. A o lea ua avatu se matou tuualalo, o le fautuaga ina ia manuia le Malo, leaga o le Malo, e le o se Malo na o outou o le Malo atoa o tatou, lea e le mafai ai ona tuua i tua ni fautuaga lelei, fautuaga e avatu ina ia manuia o tatou tagata. Ae o lea e saunoa le Afioga le Minisita e leai se gau a o le Lipoti lea a le Faalapotopotoga lea ou te uua lau afioga. O le 2021/22 e \$22 miliona le gau. O le mea lea...

FOFOGA FETALAI: Ua talanoaina le Lipoti lea i totonu o le Palemene pe le i talanoaina?

Afioga LUPEMATASILA GALUMALEMANA TOLOGATA TOGIA TILE LEIA: Ia, lea ua i totonu o le Palemene le Lipoti lea 2021/2022 a o lea e le i sau le 2022/2023...

FOFOGA FETALAI: Ia, e i ai se taimi ona tatou oo lea i le tulaga lena...

Tofa Hon Olo Fiti Afoa Vaai: Lau Afioga i le Fofoga Fetalai, pe maua se avanoa?

FOFOGA FETALAI: Ia tulai mai lau Afioga i le Minisita.

Tofa Hon Olo Fiti Afoa Vaai: Lau Afioga i le Fofoga Fetalai, e sili pe a ou faamalalamaina atu le mea lea. O le 2021/2022 lena o le tatou stimulus package lena lea na faapau ai lalo le 20% ma mafauauga o le faigamalo, e uma i i ona toe recover uma a lea. A o le taimi tonu lena, e ave le fesoasoani i le mamalu o le atunuu. Sa manaomia e le tatou atunuu se tulaga faapena. O le mea foi, o nei mea o faiga pisinisi e fetuutuunai lava le tofa ma le faautautaga. A ua manaomia loa e le Malo po o le mamalu o le atunuu se fesoasoani ona faapena

lea ona fetuutuunai ia Tulafono ma faiga faavae a le Malo i se fesoasoani e ave i le atunuu. E le i tupu lea mea muamua. Ae o le tulaga la lena, e oo la i le taimi lenei lea ua amata ona toe recover uma le tulaga lea e pei ona saunoa i ai le sui mamalu. Ia ma le faaaloalo.

FOFOGA FETALAI: Faafetai. Ia lea ua faamanatu mai e le i talanoaina le Lipoti lea ua faailoa mai e lau afioga i le sui usufono mamalu. Atonu e i ai se taimi ona maua lea o le avanoa e talanoaina ai le mea ua e finagalo ai ona e le i talanoaina i totonu o le Palemene. O lena ua i luga o a outou laulau ae e le i talanoaina. O le mea lea ua ou manatu, ia ua faauma ai i i le taimi o lau afioga i le sui usufono mamalu. Ua maea lou taimi.

Afioga LUPEMATASILA GALUMALEMANA TOLOGATA TOGIA TILE LEIA: Ia, o le a usitaia le faatonuga a lau afioga i le Fofoga Fetalai. Ia manuia tele toe taimi o totoe o lenei aso i le fonotaga a le tatou Palemene. Faafetai.

Afioga Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai, e puupuu a se mea e fia faamalamalama, ou te fia malamalama ai foi. Ona o le Tulafono Tumau, pei ona faauilavea e fia malamalama. E taua le fesili a le Sui Taitai o se faauilavea? O le mea na lea ou te fia malamalama ai lea sa fesili i le isi sui usufono. E taua le fesili a le Sui Taitai o se faauilavea? E tusa ai ma Tulafono Tumau. Pau lava lea o le mea na ou atu ai. Afai e leai, ua ova le lē mafaufau.

FOFOGA FETALAI: Ia malie foi le Afioga i le Minisita.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o fesili le mafaufau ia ituaiga fesili faapea. Faitau lelei le Tulafono Tumau, o le mea e fia faamalamalama lea e agai i ai le fesili i le faauilavea. E lua lava mea, o le mea e fia faasao ma le mea e fia faamalamalama.

FOFOGA FETALAI: Lau afioga i le Sui Taitai, o lea ua manino. Lauofo.

Afioga Hon Valasi Luapitoifanua Toogamaga Tafito Selesele: E le o se fesili. Ua leva ona e faipule e te le o malamalama.

Tofa Hon Lauofo Fonotoe Nuafesili Pierre Lauofo: Fai mai oute le malamalama. A lea ou te malamalama?

FOFOGA FETALAI: Lelei, lea ua maua. Malie a oulua afioga se i tuu mai pea i le Nofoa. Ia e faataga le fesili a le sui usufono mamalu agai i le sui usufono lea e saunoa. Ae pei ona fia malamalama ai foi ia lea na mafua ai ona faataga e le Nofoa. Ia a o le faalauteleina la, ia ua lautele tele le alu o lana... Ua nofo a ia ma faaopoopo isi mea i tala atu... Ia ae aoga foi mea tutupu. Lea ua faafogafoga mai le Sui Taitai, ia alofagia tulaga faapea. Ia fesili pea ma

faauilavea i le mea o lo o saunoa i ai le sui usufono ona manino loa lea o tatou Tulafono Tumau. Ae ui i lea, lea ua maea lea mataupu o le a faagasolo le tatou fono. Tulai mai se sui usufono.

Ia, o lea ua vaai atu e pei lava ua aoga foi le mea... pei ua malamalama uma ai i le tatou Tala Faaopoopo o le Tupe.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

FOFOGA FETALAI: Ia, e...

Susuga Hon Tuilaepa Fatialofa Auelua Sailele Malielegaoi: Ia se i tuu mai pea le avanoa. Se i silasila mai i le matou Vaega ua le iloa pe tatau ona tutu atu e fesili leaga o lea e tutu atu e lauga ma e taofia mai...

FOFOGA FETALAI: Ia, leaga tatou te o lava i Tulafono Tumau na tou faia. E lelei lava lou tali manino atu faapena. E le mafai foi ona sopoloa foi se faamatalaga o lea e i ai le Tulafono.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e pei o le mea lena e manaia ona fai ma fai a tatou fono e faamalamalama ai e oe a tatou Tulafono Tumau.

FOFOGA FETALAI: Ia o lea ua faamalamalama atu. E leai, o lea lava e faasoasoa atu i luga nei. Ia, ua i ai le manatu... O lea ua... Faleata 4. O lea ua maitau atu o le avanoa lena mo le sui usufono mamalu.

Tofa Ale Vena Ale (Faleata Nu.4): Lau Afioga i le Fofoga Fetalai, afai ua leai se isi e toe fia saunoa, ou te faatuina atu se lafo, *Ina ia pasia nei loa le tatou Tala Faatatau Faaopoopo o le Tupe.*

Faafetai.

FOFOGA FETALAI: Oi, ia lea ua faailoa mai e... Ia malie le sui usufono mamalu lea ua faailoa mai o lo o fia saunoa le sui usufono mo Vaisigano 1.

Tofa Ale Vena Ale: Ia faafetai toe faafoi mai lau afioga. Manuia le tatou Fono.

Afioga NIUAVA ETI L. MALOLO (Vaisigano 1): Faafetai i lau afioga i le Fofoga Fetalai. Ia e manatu lava i le tapuaiga a si ou itumalo. Afai ou te oo mai i le Palemene lena, o au o le tofi o le itumalo. O le tapuaiga o se tu lea ma se aga e mamalu. E le gata i le tapuaiga a ulusina o Samoa, a o faiva o tapuaiga o lo o tapuai faafeagaiga tau i le lagi a lena itumalo aemaise foi o ulusina, tama ma tina matutua o lena itumalo. O le ala lea o le tulai.

E i ai le manatu lau Afioga ou te faafeiloai i lau Afioga le Fofoga Fetalai, aemaise foi o le afioga i le Tamaitai Palemia, Sui Palemia, aemaise o le Kapeneta ma saofaiga a Minisita Lagolago. E faafeiloai foi i le Taitai o le Itu Agai ma lena itu o le Palemene o Samoa.

E faafeiloai foi i le saofaiga a Ofisa Sili o Pulega, aemaise foi le Susuga i le Tamaitai Loia Sili aemaise foi o Le Ao o le Malo ma le Masiofo, o le Sui Ao. Le Ofisa o Faamasinoga aemaise foi o le mamalu o Samoa o lo o faafofoga mai.

E faapitoaugafa se faatalofa e i ai le tapuaiga a si ou itumalo. Pe le oo lava se tatou upu i le mataupu e pei ona lauliliu i le Tala Faaopopo o le Tupe, a ia outou faafofoga mai o lo o faatalofa atu la outou sui usufono sa outou tofofi i le Palemene o Samoa. Matia ma Matiaitua, Falefaaea ma Faletagaloa, e faatalofa i lo outou paia ma lo outou mamalu, aemaise foi o ou aiga o tapuai i itu e fia o le lalolagi ma Samoa nei. E faatalofa atu.

Ae fia pai se lagona o lenei itumalo... e i ai le manatu o le Palemene ma le matou saofaiga matou te lalago atu, matou te avatu se fautuaga. O le a sa matou fesoasoani, a le tau i le saofaiga toe faafoi mai i le itumalo. Leaga e i ai nai mea tetele e tatau ona faailo. E manatu e le toe oo se faamatalaga a lenei itumalo i manaoga foi... Masalo o lena ua maua, ae i ai vaega tetele e fia faailo o le a ou amata mai ai i le vaega lea o le Ofisa o Aoga i le Afioga i le Minisita, ona lea sa tele ina saunoa nisi foi o sui usufono mamalu i tulaga lea o le tatou fesootaiga lea o le wifi. Ae ua ala ona ou tulai, ona o le matou aoga, o le aoga a le itumalo lenei, sa aafia ai le mea lenei o le matamata ai o tamaiti i ata e le fetau. O le ala lea o lou tulai atu, e le agai la sa matou faamatalaga po o ai e sao po o ai e sese. E agai se faamatalaga a lenei itumalo po o le a se auala e toe foia ai le aafiaga o finagalo o le fanau na matamata i nei ata? Ua i ai le talitonuga, ua aafia fanau o lenei nuu. E mafua aisea? E mafua ona o le faatamala o le aufaigaluega. O le aafiaga la o fanau e le mafai ona toe aveeseina. O le a faaauau ai pea tusa lava pe ua aveese pe ua disconnect le wifi ma mea uma, a o le mea lea e fia momoli e lenei itumalo, o le aafiaga o fanau nei i le agai i luma. Na ona matou oloolopitovaa ma matou faufautua i lau afioga le Minisita. Masalo o lea ua oo atu le Lipoti a le Tamaitai Pule o le Aoga i Auala i Primary School i lau Afioga aemaise foi o le Minisita o Fesootaiga. O le agaga lena o lea e fia faaali. O le aafiaga o lagona e le mafai ona toe aveeseina. E mafai ona delete le info i luga le laptop, a o totonu o le aafiaga o mafauaiga ma lagona o le fanau, e leai se polofesa e mafai ona ia toe aveeseina le aafiaga lea. Lau afioga mo le lumanai, se i toe tagai ane.

I le itu lava lea, masalo foi ua faafofoga Samoa i le gasegase a malo o le Matagaluega o Aoga i le tulaga i faiaoga. E i ai le talitonuga o lenei usugafono, e le o i ai se sioki o faiaoga. E le o sioki faiaoga. A silasila lau Afioga i le tele o Matagaluega a le Malo toetiiti lava o faiaoga uma na i ai. E i ai le talitonuga o lenei itumalo, e i ai le drainage lea e agai uma i ai faiaoga. O lona uiga la, i sa matou ia tuualalo ma le faaaloalo tele, tagai ane pe faapefea ona poloka le drainage lea e drain ai faiaoga. A silasila i ai, e tasi lava le tausaga e faiaoga ai, vaai atu la ua i o le MNRE, la ua i le MOF, la ua i o i isi Matagaluega. O le a le mafuaaga? O lena ua i ou aao lau afioga. Afai e attractive le package la e i o i Matagaluega a le Malo, e agai uma i ai. O le a le mea e le poloka ai loa le drainage lea a tatou? Attractive package mo faiaoga o le tali lea. Ua tatou fiu foi e fai lenei mea. Lau afioga le Minisita, e train faiaoga. O le a train, train, train, tulou, ua leiloa e mafau o nai a tatou faiaoga po o fea o le a tuu ai. Ae

i ai le talitonuga ma ou te talitonu foi o le talitonuga lea o le Maota Fono nei, fai se attractive package mo faiaoga. E train faiaoga i o ma o ai i fafo ona e lapopoa tupe. O le a le mea e le fai ai se package lelei? Ae i ai lou talitonuga lau afioga o le ivitu lenei o so o se atunuu o le lalolagi.

E tatalo ai i lau afioga i le Tamaitai Palemia ma le faigamalo ua tataua ona faatino vave, leaga o le ivitu lea o so o se atunuu ia atamamai lana fanau. Ae afai tatou te toso pea faapea, ae ua tataua ona fai se fuafuaga vave. E i ai le talitonuga, o le generation lenei o se generation pito sili atu lea ona afaina le agai i luma. Aisea? Afaina le ola aoaoina ona o le ituaiga mea lea ua leai ni faiaoga. A o le ala foi lea o le uunai pea o le tatou wifi lea. O le tasi lenei option e fesoasoani i tatou faiaoga. E pei o le faiaoga la e faiaoga i Asau i le Kolisi. E tasi lava le faiaoga e lecture atu i inei pe lecture atu i le Kolisi o Samoa la e i ai le faiaoga Science ae koneti uma aoga nei. O lena e mafai ona fai i totonu o le zoom i ofisa. O le a le mea e le faatino ai lea vaega? Ae tataua ona faatino vave, ona taumafai lea e taofiofi ai le momoli atu o le curriculum lea i totonu o aoga uma o Samoa pe a lelei le connectivity. Ia pei lava ona fai atu, na ona matou tuutuu atu a o lo o ina le tofa ma le faautautaga mamao. Ae i ai le talitonuga, ua tataua ona vave fai le tatou...

Afioga Hon Toelupe Maoiautele Puumulinuku Onesemo (Minisita mo Fesootaiga ma Faamatalaga Tekonolosi) Lau Afioga i le Fofoga Fetalai...

FOFOGA FETALAI: Ia malie le sui usufono mamalu, o lea ua faauilavea le afioga i le Minisita o Fesootaiga. Ou te talitonu o lea foi sa saunoa manino i ai le Minisita i le aso ananafi. Ia lau afioga i le Minisita.

Afioga Hon Toelupe Maoiautele Puumulinuku Onesemo: Faafetai. Ia leai lau Afioga i le Fofoga Fetalai faafetai mo le avanoa. E leai se agaga e faalavelave i le saunoaga matagofie a le afioga i le sui usufono. E pau lava lea ina ne i matau mai le atunuu, o le school connectivity sa taumafai i ai le Malo lea e aafia ai le itumalo o le Afioga i le... ia leai o isi providers e pei o le tulaga pei ona faamanino ananafi o isi providers ae o le tulaga sa fitaituga ai le Palemia ma le tatou Faigamalo ua uma ona faia screens ma mea e poloka ai le vaega lea. Ma le agaga faaaloalo.

FOFOGA FETALAI: Ia e talitonu lau afioga i le sui usufono mamalu o lea ua manino le saunoaga a le afioga i le Minisita i le aso ananafi. E talitonu o lea ua manino ia vaega uma.

Afioga NIUAVA ETI. L. MALOLO: Ia faafetai o le a le toe oo i ai se saunoaga i ia tulaga. Ae na ona tuu atu e tuutuuualalo ma oloolopitovaa i lo lua sa folau ae o lena o lo o i ai le tofa ma le faautaga.

Ona oo mai lea o se faamatalaga lau Afioga, se i toe tagai ane i a tatou telefoni o fesootaiga. E pei lava ona fai atu o le matou ia pito i Salafai o lo o faaletonu le tulaga i le fesootaiga i telefoni. E aoga i le falemai, e i ai fesootaiga e moomia ae na ona tuu atu faapena e silasila ane i ai lau Afioga.

Ia ona oo mai lea o se faamatalaga i lau afioga i le Minisita o Faatoaga ma Faiga Faiva, e momoli foi le agaga faafetai e tusa ai foi o galuega o lena tausaga. Ae ua ou tulai e faaleo le agaga faafetai o lenei itumalo, o lea ua mafai ona matou tuuina mai le pa povi o lo o i masamasa. Ia sa amatamea ai foi le Malo i lena foi vaiata, ae ua vaai ma le agaga foi lena vaiata ina ua le toe o i ai le aufaigaluega, o le ala lena o le naunau atu o lenei itumalo. E momoli le agaga faafetai, ia o la ua i ai manu a lenei itumalo masalo o se fesoasoani tele lea i le tatou faigamalo, a i ai se taimi e manaomia ai ni manu aua le tufa atu i le paia ma le mamalu o le atunuu ae o lo o i ai si poloketi lea a lenei itumalo.

E momoli foi le agaga faafetai, o lea foi ua aumai le tusi aloaia ua faapea ona faamatuu mai le aisa mo le aufaifaiva i le afioaga i Asau e faapea ona faatinoina i lalo o lenei itumalo. E momoli ai le agaga faafetai i le taulagalaga foi ma le taliaina foi o le apaapa atu a lenei itumalo ina ia faamatuu mai nai vaega ia e galulue faatasi ai le Malo ma lenei Matagaluega.

Lau Afioga, i le Matagaluega o le Siosiomaga, ia e leai e na o matou tuutuualalo. A maitauina le agai i le pito lea e faufautua pea i le Matagaluega le faamalosi pea lea o le toe totona ma le taina o laau i autafa o auala i le tafa i le agai lea i le pito e pei ona.... O le mea lea ua matauina i le taimi e tetele ai timuga e i ai lava le solo i le pito lea. Afai foi o faafofoga mai le paia o le atunuu o alaala i vaega maupuepue ia i autafa o le auala, o le fautuaga e le fautuaina le toe taina i lalo o laau i autafa o vaiatafe aemaise foi autafa o auala e pei ona i ai. A vaai nei i le agai atu foi i le pito lea i tua, o le tele ia o auala ua solo. Ae i ai le talitonuga o lenei usugafono, e tele lava le fesoasoani o laau tetele nei e le gata i ona a'a o ona lau foi ma le mafala e tau faalemu ai le pau o le timu i luga o le palapala. E le mafai e ferns ma tamai vao la e i autafa o le auala ona talitali le mamafa o timuga. E i ai le talitonuga e tuutuu atu i autafa o lau Afioga i le Minisita ina ia toe faamalosi nuu ma afioaga. E manatu o lo o faatino le galuega ae o se faamalosiua lea. O le mafuaaga ona o le tele foi o tupe a le tatou Malo e toe alu pe a oo ina solo auala ma vaega tetele ia.

O nei i le taeao na ou usu mai ai i le Fono ae ou o'o mai i ina i luma tonu lava i tala mai o le Pele Rose o lo o faatafa ai le taavale a le faifeau a Nu-u-fou o taga lapisi tetele faapea e lua ua pau i luga o le auala ae ua salalau solo i luga o le auala. Masalo o le matau foi lea i taimi o aso fiafia. Na ou vaai la ua tu le taavale a le faifeau ae fai le... o fagu, o mea uma ua paepae i luga o le auala a o lenei e fepasia'i atu. O se avanoa e momoli ai le agaga faafetai, afai o faafofoga mai le Susuga i le Faafeagaiga, o le agaga lea e tau pu'e atu o le agaga o le galulue faatasi o Matagaluega ma le atunuu. Ia na ou oso loa lea i lalo ma lo'u peleue ua fai le ma taega otaota ma le Susuga i le Faifeau, ia a o se faamanatu foi i le paia o le tatou atunuu, se i toe silasila ane i a tatou lapisi nei e feaveai e mataga a o tapena foi le tatou fonotaga mai atunuu mamao lena foi o le a alo atu ai ia Oketopa, ia e lelei lo tatou galulue faatasi.

Ia ona faai lea o se matou tala lau Afioga, molimauina foi i le aso ananafi o lo o faapea ona tapena atu le Miss Samoa e agai atu i le tauvaga e pei foi ona iai i ina atunuu. Ua oo i ai se faamatalaga a lenei itumalo ona o se alo foi ma se fanau a lenei itumalo. O Moemoana Safaato'a Schwenkie o se alo foi e faasino i lenei itumalo. O le matou tatalo ia i ai le agalelei o le Atua, faamanuia le Atua,

ua e ave foi le fu'a o le atunuu matou te faamanuia atu i le tauvaga o le a faapea ona e alo atu i ai. E tapuai atu le Palemene, aemaise foi o le sui usufono o lou itumalo i lou aiga i Savaii, ia manuia ou faiva.

Lau Afioga i le Fofoga Fetalai, toe tasi lava si mea mulimuli lenei e fia oo i ai se faamatalaga, silasila ane le tatou atunuu i luga o upegatafailagi. Ia tailo lava i se silasila a le atunuu. O le aafiaga e pei ona avatu o le tasi lenei generation a tatou e tele lona aafiaga i le siosiomaga lea tatou te feola ai, o le siosiomaga lea ou te fia talanoa i ai o le upegatafailagi i luga o le facebook.

E faanoanoa ia o le agaga talu ona ou faiaoga ou te le i oo lava i ni gagana e faapea i totonu o lenei tusifoliga ma lenei apps. E manatu foi o totonu o le Palemene ua malepe le tamaliiaga. Le Afioga i le Tamaitai Palemia ma le Kapeneta, le Taitai o le Itu Agai, ua matuai malepe lava, e oo lava i aiga ua mavaevae aiga. A o le mea sili ona faaeteete ma popole i ai lenei itumalo o le aafiaga o a tatou fanau.

O le generation lenei i le tilotilo a le fanau ina ua access totonu o nei gagana e faaoga i totonu o lenei tusifoliga po o le app lenei o le facebook ua matuai tele le afaina i le lumanai. O le a le faiva o i tatou o Taitai o le atunuu? O i e tasi lenei platform o lo o i ai le faitagai ma le lotomataua i totonu. Na ona matou tuutuualalo, o fea o i ai se tofa ma se faautautaga? Suspend ia lea mea o le facebook ma le atunuu. Se taimi toe faaola mai, a ua i ai se loto fealofani i totonu o le atunuu.

O se matou faaoololomaau lea. Ia a o le faaoololomaau a Vaisigano ua na o se foe lava e faaee i le tau ae tafea i le tofa ma le faautautaga.

Ia lo matou itumalo Vaisigano, ia tapuai mai, ua alu foi le savaliga o lenei tausaga, ia faasolosolo atu a tatou Poloketi, ia o lea ua ave i totonu le tatou okika. Ia faatalitali mai mo le isi a tatou miliona e faatino ai a tatou galuega.

Ia manuia Samoa ua potopoto, manuia foi Samoa o faafofoga. O Vaisigano foi i itu e fia o le lalolagi ma o'u aiga, ia malo le tapuai. Ia o se matou tala lea lau Afioga i le Fofoga Fetalai. Ia manuia tele lau Afioga i le Fofoga Fetalai, faamanuia i le Palemene o Samoa. Faafetai.

FOFOGA FETALAI: Malo faafetai. Ua faamalo le saunoa i lau afioga i le sui usufono mamalu o Vaisigano 1 e tusa foi o finagalo faaalua lava le silafia e le tatou Maota mo le agai i luma. Malo lava mo le sao, faafetai.

Ia o le avanoa nei mo se tasi o sui usufono. Ia lea ua matau atu lea ua fou mai le sui usufono mo Faleata 1. Ia o le avanoa lenei o lau afioga i le sui usufono mamalu.

Tofa MANULELEUA PALETASALA T. TOVALE (Faleata 1): Ia faafetai i lau Afioga i le Fofoga Fetalai mo le avanoa. E muamua foi ona ou faatalofa atu i le afioga i le Taitai o le Malo lau Afioga i le Tamaitai Palemia, e manatu o lea ua toe faafoisia lou malosia aua le faaauauina o le galuega. Ia e faatalofa atu foi i lau Afioga i le Fofoga Fetalai aua foi le faatautaiga o le tatou Fonotaga e pei ona i ai lenei taeao ma le aso ananafi.

E faatalofa atu foi i alii ma tamaitai Minisita o le Maota, e faapea foi ona faatalofa atu i afioga i Minisita Lagolago, aemaise foi o le faatalofa i le afioga i le Taitai o le Itu Agai aemaise foi le la itu o le Maota.

E le faagaloina foi le faatalofa i le aufaigaluega tofofi a le Atua o lo faanonomanu aua se manuia o le atunuu. Ia e faatalofa atu foi i Ofisa Sili o Pulega o Matagaluega a le Malo aemaise foi o Pisinisi Tumaoti ia e faatalofa atu i lenei taeao.

E faapitoa foi se faatalofa i lou itumalo o Faleata 1 o lo o faapea foi ona faafogafoga mai i lenei taeao, ia se i faia se leo o le tou sui usufono e pei ona outou tusilima i ai. E manatu e leai se manatu o le sui usufono i le tulaga i le Tala o le Tupe Faaopoopo ua matua malie atoatoa lou nei sui usufono le Tala Faaopoopo o le Tupe. Na pau lava lea o le mea e fia tulai ai le sui usufono se i faaali foi ni lagona o le sui usufono i tulaga aua foi le atinae o le tatou Malo aemaise foi si ou itumalo leaga o lea e faafogafoga mai.

O le mea muamua e fia agai ai se faamatalaga e agai atu i le afioga i le Minisita o Aoga, o lea faafogafoga mai le afioga i le Minisita e pei lava ona avatu ai foi nisi o manaoga i lena foi tausaga ae o le a taatia atu pea. Na o le pau lea o le mea e toe fia faamanatu atu pea i lau Afioga ona o lenei vaitau ua i ai, o lea lava e faatuputupulaia le fuainumera o si o tatou Malo aemaise i alo ma fanau i aoaoga.

O le mea e fia faamamafaina i se tautalaga i le manaomia e le... aemaise a o itumalo ia a matou i le talafatai i Apia. Aua pei ona silafia, e pei a o i inei i itumalo i Apia lea e tele ona omai uma i ai e fai mai i Salafai aemaise foi o nisi i nuu i tua ona o le tele o faamanuiaga lea o lo o maua ai aemaise lava mea ia tau aoaoga. E maitau lava e lou sui usufono le tulaga o aoga primary schools i totonu o le itumalo lenei o Faleata 1, ua uma foi ona ou asiasi i ai ma faatalatalanoa ma Pule Aoga, e leai lava se Pule Aoga o lo o faapea mai ua fai lava si laiti o potu aoga ae ua ova ma le 30 i le 40 tamaiti i le potu e tasi, ioe. E pei lava o le faafitauli lea lea e tulai mai i totonu o aoga ia aemaise ua aoaoga ia i totonu o itumalo.

O lea la e avatu ai se tuualalo i lau Afioga pe le silasila ane pe le tatau on ai ai nisi o faleaoga faaopoopo i totonu o itumalo nei aemaise ai lava si o'u itumalo, ona o le tulaga lena ua ou faaali atua e ova ma le 30 i le 40 tamaiti aoga i totonu o le vasega e tasi. E le gafatia foi la e le faiaoga ona faatonutonu le fuainumera lea i totonu o potu aoga. E moni lava o lea e i ai nisi o aoga foi ia tumaoti - private ae o si ona pona e le gafatia e nisi o matua i le taugata o pili, na o e lava e gafatia pili o aoga ia e mafai ona ave ai a latou fanau e faaaoga ai. Ae pei lava o le tele a o matua e tulituliloa lava aoga ia a le tatou Malo, primary schools a le Malo aua e taugofie pili toe faigofie foi ona faaaoga ai a latou fanau. E pei o le agaga lena o lea e avatu ai se lagona foi o lenei itumalo i lau Afioga i le Minisita ina ia toe silasila ane ai i le tulaga lea pei ona ou talanoa atu ai i lenei taeao. Na pau lava lea o se mea o lea ta te fia talanoa atu ai i lau Afioga i le Minisita o Aoga.

Ona oo mai lea i le Afioga i le Minisita o lea ua matau atu o lea ua afio mai le Afioga i le Minisita o Leoleo, lau Afioga Faualo. Ia, e le o se faatauagavale i le galuega a alii ma tamaitai leoleo, aemaise o le Matagaluega. Na pau lava lea o

se tuualalo, leaga e matauina leaga o le Matagaluega lea o lea o lo o tuu i ai le saogalemu o le atunuu e ala i faalavelave o a ni mea e tutupu. E maitauina lava e lou nei sui usufono lea foi sa avatu ai se tuualalo i le la foi tausaga i le tulaga lava lea o le pisapisao ma le leoleoa o laau ma pu o taavale, lea foi lava sa tali lau Afioga i le tulaga lea, a o lea lava e maitauina o lea lava e tupu lava.

E ala ona ou toe faamanatu atu, leaga o itumalo lava ia a matou i le talafatai i Apia, o lea lava e tupu ai. E pei e foliga mai o la e pei lava e omai mai isi taavale ia mamao atu i tua i isi itumalo, ae pei e faatitino mai lava a latou laau ia ma latou mea ia i totonu o le taulaga faapea leaga o la e tumutumu ai tagata. O le tulaga tonu lava lena o lea e ala ai ona tupu i totonu o le itumalo lena ma le talafatai o Apia tulaga na, aua e le faaleoteleina latou laau i tua aua leaga e leai nisi e tilotilo i ai ma faalogo i ai. E omai faatitino i totonu o Apia. O le tulaga tonu lava lena o lea ou te toe faamanatu atu ai i lau Afioga i le Minisita.

Lua, e pei lava ona ou fai atu e le faatauagavale i le galuega leaga e taua le galuega a alii ma tamaitai leoleo i le saogalemu. O le vaiaso lea na tea atu nei o la e silafia foi e nisi o afioga i sui usufono, ona o le taimi e fai ai a latou check point foi nei i luga o le aualatele, i le le talafeagai o le taimi ma le location lea e fai ai le galuega lea. O se faataitaiga lava le Aso Tofi lea na tea nei, le taimi o le aoauli i le pisi o taavale, ae ou agai mai ma nisi o sui usufono matou te omai mai tua, matou te tau mai Malie faasolo atu i tua, ua matuai poloka lava taavale, queue. Ia ona faapea lea o matou, ai o se faalavelave o tupu i le aualatele. Ae matou agai agai mai lava ae matou tau mai le va o Puipaa ma Toamua, e toatolu lava leoleo la e fai ai latou taofiga i ina, a o le queue la e ua oo i Malie faasolo atu ai i tua. O le sau mai o i le itu le la, ua toetiiti lava oo mai Vaitele.

E pei o le tulaga lena lea e avatu ai se fautuaga i lau Afioga i le Minisita, o la e faafofoga mai le Komesina ma le Sui Komesina ma le Matagaluega, se i silasila ane lava i le vaega lea. Aua o le mea e tupu, o le saogalemu, a sau se aiga e momoli mai se faalavelave i tua le latou lava taavale e ese mai le taavale a le falemai, e le mafai ona sau lava le taavale lea kolosi mai luga o isi taavale, e follow mai lava i le queue. A oo mai la i i o lea e tuli mai le falemai tele i Motootua, ia, ua oo i ai se tulaga pe ua maliu pe ua afaina. E pei o le agaga lena, e i ai lou talitonuga o lea lava e i ai taimi e tatau ai ona faatino le tulaga lea, ia ma nisi foi o magaala e tatau ai ona faatino le latou galuega lea. E pei lava ona ou fai atu e le faatauagavale i le latou galuega o se galujega taua tele, ae pau lava lea o se tuualalo se i silasila ane i le vaega lea lau Afioga i le Minisita.

O le tulaga o fualaau faasaina ia pei ona taua...

FOFOGA FETALAI: Ou te vaelupeina le saunoaga a le sui usufono mamalu talu ai o lea ua tatou oo i le tatou taimi malolo o le taeao. Faaauau le saunoaga pe a tatou taliu mai le tatou malologa.

Ua faataatiaese galuega a le Fono Aoao mo lana malologa masani o le taeao.

Na faataatiaese Taulumaga a le Fono Aoao Faitulafono mo lana malologa masani i le itula e 10:49 i le taeao ma toe faaauau i le itula e 11:27 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

E i ai le manatu ua maua se faasiligamalosi o le paia o le Palemene e ala i le tautega ma le taligasua sa alo atu i ai, tatou te faafetaia lava le alofa o le Atua i Lana foai.

E faataatiaese a tatou Taulumaga mo le malologa o lo o saunoa le sui usufono mo le itumalo o Faleata I.

Ou te tapa ma le faaaloalo lau Afioga i le sui usufono mamalu mo le faaauauina o lau saunoaga.

Tofa MANULELEUA PALETASALA T. TOVALE: E momoli le agaga faafetai i lau Afioga i le Fofoga Fetalai mo se avanoa foi ua toe maua e faaauau ai se tautalaga. O tulaga o lenei taeao, e momoli foi le agaga faafetai lea ua tali le sua ua maua foi se faasiliga malosi aua foi le faaauauina o le galuega.

Ona oo mai lea o se faamatalaga i le... o lea lava e i luga lava i le Matagaluega lea o Leoleo. E pei lava ona maua foi e le mamalu o le Fono i le aso ananafi, sa i ai foi manatu i tulaga ia o... i finagalo ia i tulaga o fualaau faasaina. Leaga e i ai lava finagalo ia sa faaali ananafi i le tulaga lea o le faatuatuai mai o le tatou scanner mo containers mo le sailia o mea ia o fualaau faasaina e sao mai i totonu. A o lea ua tali manino le Afioga i le Minisita e le o toe mamao ae maua mai.

A o le tulaga o le isi vaega e ala ai ona ou talanoa i le vaega lea i le faatupulaia o mea nei o fualaau faasaina, e i ai lou talitonuga e le o tele se fualaau o sau i fafo, sao mai totonu o mea ia o container. O le tele o fualaau ia e maua i totonu o le atunuu leni o lea ua fai i totonu o le atunuu, o lea ua fau... fai... O lea foi e maua i sailiiliga a leoleo i vaega ia e maua mai, o i latou foi nei na maua muamua lea foi ua toe maua, a o latou ia mai atunuu i fafo. E nonofo i fafo lea ua latou maua mai le experience, le poto masani i le poto, le atamai i le faiga o fualaau nei lea la ua omai ai fai i totonu o le atunuu. O le tele lena o fualaau lea e maua nei ua gaosia lava e latou i totonu o Samoa. Ae i lou talitonuga lena, e moni a foi ai o i ai ni mea o sao mai totonu i mea ia containers, ae o le tele o fualaau o lea e i ai lou talitonuga o lea e fai i totonu o le atunuu.

O lea ou te momoli ai foi le agaga faafetai i le Afioga i le Komesina ma le Matagaluega o lea lava e tele lava foi ina maua le vaega ia i le tulaga lea i le fauina o mea ia o fualaau, i le gaosiga. Ia aemaise lava la aua o le isi mea lea e tau matau atu, a faapea o le tele o isi vaega lea e faaoga e tagata nei e gaosi ai le mea lea, o le tele o fualaau, o fualaau ia mai faleoloa aemaise o totonu o le Matagaluega o le Soifua Maloloina, le Falemai. E tatalo ai foi i tulaga e pei ona... lea e faafofoga mai le CEO o le Soifua Maloloina, se i silasila ane, e le iloa po o i ai ni auala faaalatua o sao mai ai le tele o fualaau aua o mea nei e le o ni tamai fualaau e gaosi ai. O le matua tele lava o pusa fualaau, aua o lea foi e maua lava tala sa maua foi nisi muamua i le tele o fualaau sa maua i totonu o containers ma mea na sa faatino ai mea ia. E pei o se fautuaga lea e avatu i leni taeao i le tulaga lena ona ua i ai tagata sa nonofo i fafo, ia a o lea ua omai ua i ai le latou atamai e gaosia ai mea ia i totonu o le atunuu.

Ia, ona ou oo mai ai lea i lau afioga i le Minisita o le Siosiomaga. E matauina lava i le vaitaimi o le maea ai o aso malolo o le kerisimasi faasolo mai ai tua i le tausaga fou, o le tulaga lava lea i mo mea o le... ia pei lava ona tatou talanoa soo i ai i mea ia mo le siosiomaga. E toeititi a atoa le lua i le tolu vaiaso e le i aoina lapisi i totonu o le talafatai lea o matou i Apia, ua matuai le nofoia foi le tele o aiga i totonu o nuu ia tu taulaga ona o mafuaaga ia. E le iloa i ai po o malolo le afaigaluega lea a le vaega lea e aoina le tulaga lea o mea o lapisi, ia se i fai ifo i ai se fuafuaga, e le tatau ona malolo latou ia ae faasoloatoa aemaise lava vaitaimi ia o aso fiafia, tele le lapisi e maua i totonu o aiga, ia ua tele ina tutumu fata lapisi ua le iloa le mea e tuu ai. Ia, ona toulua lea i lalo ae omai mo taifau se i vaecane le faafofogaaga a Samoa ma le atunuu, ua faataape lapisi ia i lalo ia ma tele ai le gaosa i lalo ma luga o le aualatele. O le mea la lea ia e talosagaina lau Afioga i le tulaga lea.

Ona oo mai lea i le... ia e le toe oo se faamatalaga i le tulaga o tatou galuega faavaitaimi. O lea e matau atu sa saunoa i ai se tasi o sui usufono i le aso ananafi ia ae pei o le tulaga lava lena lea sa tau avatu ai se manatu i le faamatuuina mai o galuega ia i totonu o Fono Faavae aemaise o totonu o nuu. Ia ae manatu e le toe oo i ai se faamatalaga.

Ia, oo mai i le afioga i le Minisita o Galuega o lea foi e maitau atu o lea foi ua tatou i ai i le vaitaimi o le lamatia o le tatou atunuu i le tulaga o le lolovaia ma vai papa i totonu o le taulaga aemaise foi nisi o afioga. E tatalo atu ai i lau Afioga se i toe silasila ane i nisi o vaega na pei ona matou tatalo atu ai aemaise lava ia... Aua e tasi lava le vai fafe lea e mafua ai ona lolovaia totonu o le taulaga, o le vai lava lea e sau mai o i Moamoa e tau mai ia matou oo mai ai i i. Ia o lea lava e maitau ia o lea lava ua amata galuega i le tulaga lea o le faaleleia o le tulaga lea. Ae pei ona toe faamanatu atu i le vai lea ia matou, pei o i ina lava lea e amata ona taape mai ai le sau o le vai mai uta, lea e mafua ai ona lolovaia ai le tatou... ia ma afaina ai. Pei o le matou nuu le isi nuu pito sili ona afaina i tulaga ia. Ia ma le isi o nai nuu la e i uta i Moamoa, mo le silafia o la e i ai le auala laupapa lea e motu soo lava i lologavai ia i tausaga uma i faaiuga. E oo mai nei lava e le i oo i ai se fuafuaga a lau Afioga i le Minisita ma le Matagaluega, po o le a le tulaga o le auala laupapa lea ona o la e tele nai aiga ia e...

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Malie lau afioga i le sui usufono mamalu leaga o lea ua taua galuega a le Minisita o Galuega Tetele.

Se i tulai mai lau Afioga i le Minisita.

Tofa Hon Olo Fiti Afoa Vaai: E faafetai atu i lau Afioga i le Fofoga Fetalai, a o si mea lea leaga o lea ua maea ona faatino le tulaga tonu lava lea e talosaga mai ai le afioga i le sui usufono. E te silafia foi lea sa amata mai tatou galuega i le amataga o le tausaga na te'a nei i le toe faalolotoina o le vai lea mai Moamoa po o le vai lea e tau o le Gasegase River. Ia e oo mai la i le taimi nei masalo pe na asiasi lau afioga, ia na ta asiasi ai foi. O lea la ua uma ona foia le faafitauli

foi lea sa masani ona oso mai ai le vai i le alasima i Vaimoso ua le o toe sau ai la se vai i le taimi lena lea e masani ona tafe mai i ina i le auala ma agai mai i Fugalei. Ae ou te talitonu na o le itu lea i tai i Vaimosotai agai mai tua o le SMI la ua fai ai se galuega lata mai.

Ae o le tulaga lea pei ona e saunoa e loloto ai le vai i Fugalei, o lena ua uma ona faatino le vaega lena ma le faaaloalo lava.

FOFOGA FETALAI: Ia, o lea ua manino le saunoaga a le Minisita, ai sa oulua asiasi i ai.

Tofa MANULELEUA PALETASALA T. TOVALE: Faafetai i lau Afioga i le Minisita mo le faamalamalamaina mai o le tulaga lea. E moni le saunoaga ae manatu o le a le toe oo i ai se faamatalaga o lea ua saunoa lau afioga lea ua amata. E moni lea foi ua ou faamaonia o lea ua tele lava ina amata galuega o le vaega lea. E momoli le agaga faafetai i lau Afioga i le Minisita e tusa ai foi ma le faatinoina o vaega ia pei ona ou talanoa atu i ai.

O'o mai lea o se faamatalaga i lau Afioga i le Minisita o Faatoaga, e momoli le agaga faafetai o lea ua matau atu ua tele lava le tamaoaiga o le tatou atunuu i tulaga o fua o faaeleelega o lo o auina atu i fafo, aemaise lava le tulaga o mea tau faatoaga... aemaise lava le tulaga o talo. Na ona toe faamanatu atu i lau Afioga le tulaga foi lea o tatou mailei foi ia lea sa... lea ua matou matamata ma matou tilotilo i ai i le tele o le aoga o mailei ia mo matou nei e fai maumaga. Ae o lea lava e talitali atu po o le a se aso e maua mai ai tatou mailei ia, o lo o manaomia lava e le matou Itumalo aemaise matou ia e fai maumaga le tulaga lea.

E manatu lau Afioga i le Fofoga Fetalai e...

Susuga Hon Laauli Leuatea Polataiva Fosi: Lau Afioga i le Fofoga Fetalai...

FOFOGA FETALAI: Malie se i tuu atu le avanoa i le Afioga i le Minisita o Faatoaga e iai tulaga ia na e saunoa i ai.

Susuga Hon Laauli Leuatea Polataiva Fosi: Faafetai mo le avanoa. Lau Afioga i le sui usufono mamalu mo le silafia e le Palemene, ia ua taunuu nei i fanua le tatou 20 mailei i le vaiaso lea na tea nei. O mailei nei lea sa outou silasila ai i mailei e lua na aumai na faataitai i ai Upolu ma Savaii. A o faafofoga mai la Itumalo o lea e aafia tele i le mataupu lena, faafesootai mai le Pulega o le Matagaluega ia ona faasolo atu loa lea. E 20 mailei o le a vaevae, 10 Savaii ia 10 Upolu ae le taofia ai leaga ua tele le faafitauli. E le laitiiti le faafitauli o manulafua lau Afioga ua sau ai foi ma le na'e ma le le toe fia faimea o le aufaifaatoaga. Ae o le auala lea ia tofu lava le Itumalo ma lana mailei faapea, aua e tatao atu nei i i ae laga i o, e oo atu i o ua toe laga mai i i. Lau Afioga i le sui usufono mamalu avatu lau tusi talosaga ia ona faasolo atu lea.

Mo le silafia e le Maota o mailei e le o ni mailei i aso ia na o le tai-tasi puua sa maua. O le mailei lena e pei o le lapotopoto o le Maota lena le tele o le neti,

ua i ai ma cameras i le taimi e alu ai totonu le puua ma sau i fafo. E atoa le vaiaso o tatao faatoa pa'u le mailei i lalo, o lena ua outou vaai atu e tai sefulu puua e maua i le taimi e tasi. Ae faafetai ua e laga lau afioga, o lea ua taunuu i fanua a tatou mailei e 20 e amata ai. Ae o le faamoemoe o le Matagaluega, e 51 Itumalo, 51 mailei e faaaoaga i ai tupe o le tou miliona. Ma le agaga faaaloalo.

FOFOGA FETALAI: Tulai mai lau Afioga i le sui usufono mamalu, ia lea ua e malamalama lelei i le faamalamalamaga a le Minisita.

Afioga Sulamanaia Fetaiai Tauiilili Tuivasa (Vaimauga Sasae): Lau Afioga i le Fofoga Fetalai pe maua se avanoa?

FOFOGA FETALAI: O fea e agai i ai lau faasea lau Afioga i le sui usufono mamalu?

Afioga Sulamanaia Fetaiai Tauiilili Tuivasa: E agai i le sui usufono o Faleata faamolemole lau Afioga i le Fofoga Fetalai.

FOFOGA FETALAI: Ia aua lava nei e faaopoopoa se tali a le Minisita i lau saunoaga, agai sao pea la i mea sa taua e le sui o Faleata.

Afioga Sulamanaia Fetaiai Tauiilili Tuivasa: O Faleata ma le Vaimauga o le uso, e tele la eleele o le Vaimauga o lo o ua galulue ma... Ae pei o le fesili a le Vaimauga i le afioga i le sui usufono, o fea lea e fai ai mailei aua o le afoaga lea o Vaimoso ma... e leai ni mea i tuamaota e tua i ai. O le popolega o le sui usufono ne i te i ua aafia ane ai nai tagata soifua i mailei lea o le a tatao. E pei o le fesili lena e tuuina atu i le afioga i le sui usufono o Faleata o lo o saunoa nei lau afioga i le...

FOFOGA FETALAI: Manaia tele le faafesili a le sui usufono mamalu, ia e sao. Se i saunoa lau afioga i le sui usufono o Faleata 1.

Tofa MANULELEUA PALETASALA T. TOVALE: Faafetai mo le avanoa. Masalo e le o silafia e le sui usufono o Vaimauga le matou Itumalo, la e manatu le sui usufono ai a tu i Apia Vaimoso ona leai lea o ni eleele. E 200 eka lea na faamatu atu e le Malo i le SLC e galulue ai Vaimoso i gauta i le mea e tau o Laloanea, 200 eka lea matou te galulue ai nei ua uma ona vaeveaina i totonu o le matou nuu aemaise foi nisi o nuu tuaoi o le matou Itumalo. O le mea lena e fia faailoa atu i lau afioga o lo o i ai eleele o Vaimoso ia ma nisi o nuu o le matou Itumalo o lo o galulue. O lea e te faafofoga mai o lea e fesiligia ai tulaga o mailei.

Ae momoli le agaga faafetai i lau afioga i le Minisita e tusa ai foi ma le tulaga o tatou mailei, e ui lava foi ina maua atu o lea e i ai ma le siusiu o le mailei ia ae le afaina lea, o lea o le a faaaoaga i ai tupe o tatou poloketi ia e faatupe ai lea vaega.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia, lau Afioga i le Minisita.

Susuga Hon Laauli Leuatea Polataivao Fosi: Ina ia manino o le 20 lea ua taunuu mai nei ua uma ona sue e le Matagaluega le tupe e aumai ai. A o isi la Itumalo e tuai atu, ia ona outou finagalo malilie lea, e faasino atu le fale e faatau ai mailei. Ae faamuamua i latou e muamua atu ma i latou o lo o manaomia i le taimi nei, priority.

FOFOGA FETALAI: Ia, malo, ua manino. Lau Afioga i le sui usufono mamalu faaauau mai le saunoaga.

Tofa MANULELEUA PALETASALA T. TOVALE: E momoli le agaga faafetai i lau afioga o lea ua maua atu masalo o lea o le a maea nei le tatou fono ona tope loa lea o le tusi a le matou Itumalo ona momoli atu lea pei o tulaga ia na saunoa i ai lau Afioga...

FOFOGA FETALAI: Ia lau afioga i le sui usufono mamalu, faaauau mai lau saunoaga.

Afioga MANULELEUA PALETASALA T. TOVALE: Ia e momoli le agaga faafetai i lau Afioga, lea ua maua atu masalo lea o le a maea nei le tatou fono ona tope lea o le tusi a le matou itumalo ona momoli atu lea e pei ona saunoa lau Afioga.

Lau Afioga i le Fofoga Fetalai, e manatu pau ia o ni lagona ma ni manaoga foi o lenei itumalo e tusa ai foi ma le tatou fonotaga i lenei aso. E momoli atu le agaga faafetai mo le avanoa. Ia manuia soifua.

FOFOGA FETALAI: Faafetai. Malo saunoa i lau afioga i le sui usufono mamalu mai Faleata 1. O lea foi ua faafogafoga le Maota i finagalo foi aua lava le agai luma e le gata o le itumalo ae o le atunuu. Ia malo faafetai.

Ia, o le avanoa lenei mo se tasi o sui usufono. Ia lea ua fou mai le sa o le Aiga i le Tai lau afioga i le Sui Fofoga Fetalai.

Afioga AUUAPAAU MULIPOLA ALOITAFUA MULIPOLA (Aiga i le Tai): E momoli le faamalo i lau afioga i le Fofoga Fetalai o le Maota e tusa ai o le galuega maeaea, ia ma le tausia o le filemu o le Maota lenei. Ae avatu ai le agaga faafetai e sautualua atu i le ta galuega. Fai mai upu o tautai o le gataifale e “fai foi o le paniuto a o le panituafoe”. E momoli le faamalo i lau Afioga i le Fofoga Fetalai.

E le tele se motugaafa a le itumalo o Aiga i le Tai ona o le Tala Faaopoopo o le Tupe lenei ua uma ona folasia le motugaafa a Aiga i le Tai i lena tausaga ua alu atu, ia ae se i o’u afe muamua i si ou itumalo. Le paia le tatou itumalo Aiga i le Tai, ia e leai lava se isi e toe faaopoopo se iota o o outou paia ma o outou mamalu. Taoto ia, ae se i tau fai se tatou motugaafa se i fai se tatou sao ia

manuvao i le Tala Faaopoopo o le Tupe lenei. E puupuu lava lau Afioga i le Fofoga Fetalai.

O le mea muamua e fia fai ai se leo o le itumalo lau afioga i le Minisita o Galuega, e muamua ona ou faamalo atu i lau Susuga Leiataualesa leaga o lou faalupega e pule i le nuu faigata. Foi mai lea o se faamatalaga ona o vaega tau poloketi. E le o'o se leo o a'u nei o le Taitaifono ona ua uma ona tatou soalaupule i le aso ananafi. Ae peitai o ni vaega e ono toalia ai le poloketi o lo o faaalu nei. Ia le itumalo pele o Aiga i le Tai i le tolu o motu o lena ua asu apefoe o le tatou poloketi na ua i ai ua outou tagatagai i ai, ae toa mai pea le tai e toe oo i ai se leo o la outou auauna pe a faaiuiu se tatou motugaafa i lenei taeao.

Lau Afioga i le Minisita sa maua le avanoa ananafi e talanoa ai i le alii Pule Sili o le EPC ona o lo o faagasolo se tasi o au poloketi, ia o le poloketi lava lenei o lo o aumai pea i ai finagalo o lou itumalo aemaise lava i latou o lo o alaala i Upolu o auala galue. E le natia le faaaogaina o le upu lea auala galue e lou tagata a o auala ia o auala ia o lo o alaala ai le tele o lou nuu ina ua le nofoia le motu i tai ae agai mai uta i Upolu. Foi mai la se faamatalaga lau Afioga i le Minisita ona talu ai e manaomia le fesiitai o poumoli la e i ai pe a ma le tolu vaiaso talu ai sa ou tusi mai ai i Matagaluega o lo o aafia i le fesuiaga o auala ma le faatinoina e i ai le Pulega o le Suavai, e i ai le vaega o le Pulega o Auala ia ma le Malosiaga Faa-Eletise ina ia oo atu foi lea e tagatagai i ai nei tei ua aafia meatotino a le tatou Malo.

E faapuupuu se faamatalaga ona sa ma feiloai ma le Pule Sili i le aso ananafi i le tatou malologa masani i le taeao ua ou mautinoa ai e i ai se vaegatupe e ono toe faaopoopo atu ai le pili a le Ofisa o le EPC agai le konekarate o lo o latou faatinoina le auala ia po o auala. E tuualalo atu i lau Afioga i le Minisita, ona e le na ma le laina o lo o tauatia e a tatou poloketi po o lea se tofa i ina ae faapafala ia lena vaega aua e one off le mea lea o le fesiitaiga o poumoli ia e le masani a'i, a ia tino mai galuega e tusa o le anavatau o lo o tatou savavali ai ina ia faatino mo le Malo ma le manuia o tagatanuu. Ia e faapena foi se talosaga. E manatu o la ua faatino le isi vaega i le fesiitaiga o mita foi nei o suavai e taulalata i le auala.

E faapea foi le talosaga ua uma ona tuuina atu i le Pulega o le Laueleele le LTA. O le talosaga lea ma le agaga vaivai i lau Afioga i le Minisita. A o i ai pea i le vaega lea i le Matagaluega o lo o vaaia e lau Afioga, e pei lava foi ona tatou feiloai i nisi o feiloaiga ma ou tuualalo atu sa i ai i le Tala o le Tupe i le tausaga 2021/2022 ia se scoping study foi lele sa faamoemoe e fai ai atumotu nei ona e le na ma le laina le aafiaga i le suiga o le tau e aafia ai taligalu ma uafu. E manatu lava ma ua silafia e lau afioga e i ai vaega na toalia ai, ia lena ua faaoo atu le sainigalima a lou itumalo ua matua malie atoatoa. Ae manatu la au i le seleni lea, ou te lagona pei lava o lea ua faasee i se special purpose account. Ia ae i ai le lagona lau afioga i le Minisita ia toe aumai i le Tala Autu o le Tupe le tupe lea sa faaagaaga mo le scoping study mo atumotu laiti nei e lua, lea sa i ai le tupe lea e \$500,000, ae manatu ona o ni itu na toalia ai ona o ni feeteenaiga foi ma le le autasi o alii ma faipule, a o le taimi nei ua matua fusi a le fau o Malo. Ua amanaia lelei le tulaga lea. Ia o le agaga lea e sosoo atu ai le agaga e

momoli atu ai le faafetai ma le talosaga e tuutuu atu i ou autafa lau Afioga i le Minisita o Felauaiga.

Ona ou oo mai lea lau Afioga i le Minisita o le Matagaluega o Tina ma Tamaitai i le tulaga lea o sui o nuu, sui o le malo, ia ma sui tamaitai. O lea ou te mautinoa o le faalagiga lea o sui o nuu sa ave e sui a'i le faalupega lea o Pulenuu ia ma Sui Tamaitai e lagolagosua i le sui o le nuu i le la galuega fai i le tausiga o afioaga. A e o le sui la o le Malo e foliga e lilifa i eleele foi nei ma nuu e le mavae, tulou lava le gagana.

O lau la tuualalo i lau afioga i le Minisita e le natia, e leai se isi e na te suia faavae o le matou motu o Manono. Ae o le afifio ai o le motu i uta nei o Upolu ia e le natia Faleu-uta, Lepuiai-uta, Apai-uta Salua-uta o le paia a lea o le afioaga o la e o lo o alaala i le motu ae tasi lo la Sui Tamaitai e tasi foi lo la sui o le Malo a oo la ina faatino galuega ma tatalo atu au i le Taitaifono e fai lava si tele o afioaga nei. Ou te tautino atu lava pei a la ua sili tagatanuu o le motu i e o lo o alaala i Upolu nai lo le motu lea e i Manono. O a fa au i lou finagalo ae faaopopo se Sui Tamaitai se tasi ia ma se Sui o le Malo e tasi ona tuufaatasi lea o le lua Leiataua lea i uta Leiataualesa ma Leiatauletaua i Faleu ma Lepuiai ae tuufaatasi Salua ma Apai aua o le taotoga lava lena o lea taoto ai nei. E tuu atu ai i ou autafa ua mamafatu le avega i le la savaliga ia ma au nei o le Taitaifono ona o lea ua soofaatasi itutino ia e lua.

O le isi foi vaega a o i ai i le vaega lea lau Afioga i le Minisita, ou te le faapea atu o le mea la e tupu i lou itumalo. E leai, ua matou galulue faatasi, Pulenuu, Sui Tamaitai, Sui o Nuu e atiae le poloketi lenei ua taumafai atu. Ae pau a o le ina ia taatia manino taiala aua o lea ou te mautinoa o Sui Tamaitai, Sui o Nuu ma Sui o le Malo o lea e i lalo o le payroll a le Malo, a o le Fono Faavae ia ma au ofisa e 14 ma le toatolu o galulue i le Ofisa, o lea e totogi i lalo o le poloketi lea. Ae ina ia i ai ni taiala e manino ai e sosoo faatasi nei itutino aua le atinaeina o le itumalo. Ia e avatu pea i autafa o lau Afioga i le Tamaitai Minisita le talosaga a Aiga i le Tai ina ia tupu ma ola le tatou faamoemoe ma le savaliga ina ia atiae o tatou itumalo e tusa o le tatou anavatau.

Faafetai i lau Afioga i le Minista mo le mailei a Aiga i le Tai lea ua muamua mai e momoli atu ai la'u faafetai i lea tulaga.

Ona ou oo mai lea e ui ina le taua i i le vaega lea o le Tala o le Tupe, ae puupuu lava lau fesili i lau Afioga i le Minisita o Faamasinoga leaga lea na maua le faataamilosaga a lou Ofisa Sili o Pulega i le Vaeg 43 ma le 44 o le Tulafono o Fanua ma Suafa. E fia maua i ai se faamatalaga auiliili i le taimi nei pe a e finagalo i ai, ae a leai ona o lea ou te maitaua ae o le fesili a lena a Aiga i le Tai. E mafua ona fesili ona e i ai mea ua tutupu i le tatou atunuu a o lea ou te iloa o le taotoga lea o le malolosi o fuaiupu ia o le 43 ma le 44 o le Tulafono o Fanua ma Suafa 2020. Ia ma le agaga faafetai.

Lou itumalo e, malo tapuai. E pei ona ou fai atu e le toe suia lava se iota o le tatou itumalo i le nonofo ai. Le aufaigaluega tofofi a le Atua malo faafetai i la outou galuega i lena tausaga. Ia alu atu ia le 2023 ma ni faaletonu, ni faaletonu o la outou sui usufono sa i ai ia outou faamagalalo. Ia o tatou taufaialo faatasi apefoe o le faatuatua i lenei tausaga 2024. Le aufaigalueg tofofi a le Atua ua faamalo faafetai i la outou tapuaiga. Ia onosai mai. E pei lava ona ou fai atu o

le tatou itumalo e le o se itumalo faigofie i le tele o ona tagatanuu, aemaise o motu e tolu ua i ai. A o la outou tapuaiga e maua ai lo'u lototele i le Maota lenei. Ia faamanuia le Atua ia te oe Aiga i le Tai o le feagaiga tutasi a Samoa. Manuia le Fonousu a le atunuu, manuia lau Afioga i le Fofoga Fetalai. Faafetai.

FOFOGA FETALAI: Ia malo faafetai saunoa i lau afioga i le sui usufono mamalu o Aiga i le Tai.

Ia se i tulai mai lau afioga i le sui usufono mamalu o Lefaga ma le Faleaseela.

Afioga Masinalupe Makesi Masinalupe (Lefaga ma Faleaseela): Faafetai mo le avanoa i lau Afioga i le Fofoga o le Fono. Sa ou onosai lava se i maea le saunoaga a le sui usufono ona o lea... e pau se vaega lea e tau avatu ai se manatu ona o le tulaga lava lea i mailei. E tau faafuafua foi le loto ina ua faalogologo atu o lea ua ioe le Minisita e muamua atu oe. Mo le silafia e le o po se lilo o le mea lava lea na taulagalaga e le sui usufono o Lefaga ma Faleaseela, ua matua mafatia lava. Ae ou te manao e aumai uma lava ni mailei se valu e avatu muamua lava i Lefaga ma Faleaseela se i foia ai le faafitauli lea ona faatoa taape loa lea o mailei ia. O le agaga lava ia, ia faamuamua le sa avatua le mataupu.

Ia manuia le fonotaga.

FOFOGA FETALAI: Ia lea ua maua le finagalo o le sui usufono, ae o le matafaioi tonu lava lea a le afioga i le Minisita ma le Matagaluega.

Ia se i tulai mai lau Afioga i le Minisita.

Susuga Hon Lauli Leuatea Polataivao Fosi: Ia ne i avea le se ma mea mamafa oso ai se toto maualuga o se isi i nei mea o mailei. Aua e te popole Masinalupe ua uma ona tusi lou suafa i le tatou mataupu, leaga ua uma ona e saunoa i le lua tausaga talu ai i le tatou mataupu lenei, ae avatu lau tusi aloaia e talosaga ai ta mailei ae o la ua i ai.

FOFOGA FETALAI: Ia o lona ua manino lona tulaga, ae faafetai foi i le sui usufono o Aiga i le Tai mo lona finagalo faaalua aemaise foi le manuia o le itumalo, aemaise foi le tatou atunuu. Malo faafetai.

Ia o le avanoa lenei mo se tasi o sui usufono mamalu o le Palemene. Ia o lea ua maitau atu o lea ua fou mai le sa o le sui usufono mai Sagaga 4, ia o lou avanoa lenei lau afioga i le sui usufono mamalu.

Afioga TAGALOATELE PASI POLOA (Sagaga 4): E faafeiloai atu i lau Afioga i le Fofoga o le Fono. Faafetai mo le avanoa o lenei itumalo. E faafeiloai atu i le paia lasilasi faatafafa o le Maota nei i le afio o lau Afioga i le Tamaitai Palemia, le Sui Palemia, ia faapea alii ma Tamaitai Minisita o le Kapeneta ia faapea foi ona faafeiloai atu i Minisita Lagolago.

E faafeiloai atu foi i le la itu o le Maota i le afio o le Taitai o le Itu Agai ma le Sui Taitai ma sui usufono o le Maota i le la itu. E faapea foi ona i ai le agaga e faafeiloai atu i Ofisa Sili o Pulega o Matagaluega ua tatou faatasi i lenei aso.

E faafeiloai atu foi i le tapuaiga a le tatou atunuu i le afio o Le Ao Mamalu o le Malo ma le Masiofo, e faapea foi le Sui Ao ma le Faletua, le faatafafa o le Tafatolu Fefaatauagai e pei ona i ai le Ofisa o Faamasinoga, lau Afioga i le Faamasino Sili ma le Vasega o Faamasinoga, e faapea foi le Peresetene o Faamasinoga o Fanua ma Suafa faapea le Ofisa o Faamasinoga.

E faafeiloai atu foi le tapuaiga a le au nofo tatalo o le tatou atunuu e tusa ai ma le faanonomanu aua le manuia o le tatou atunuu e pei ona i ai i le amataga o lenei tausaga.

E faafeiloai atu i le tapuaiga a Aiga ma latou Tama, Tama ma latou Aiga, ae faapea foi le tapuaiga a Tumua ma Pule, Ituau ma Alataua, Aiga i le Tai ma le Vaa o Fonoti.

E faafeiloai atu i si ou itumalo o Sagaga 4 i le afifio o Aiga, Toetaufanua a le Malietoa, afio Tama Alosina, afio Tilialo ma le Aiga Sa Tilialo, afio Nonumalo o le Maopu o le Aiga Sa Tilialo, susu Alo o Malietoa Sapau ma Leiataatimu. Faafetai i le tapuaiga ua manuia ai le alofaiva o la outou auauna e pei ona i ai lenei ituaso.

Lau Afioga i le Fofoga Fetalai, e fia fai se faamatalaga a lenei itumalo e faafetaia ai le amataga o lenei tausaga. Faamalo atu faafetai le tauatai lau Afioga i leFofoga Fetalai i le tulaga o galuega ma le faapalepale i tulaga o le tatou galuega, e amata mai lena tausaga, o lenei ua toe amatalia i lenei tausaga.

O lenei itumalo o Sagaga 4, e seasea tagisa i ni vaega e pei ona i ai. Na o ni nai vaega laiti lava e manatu le sui usufono o Sagaga 4 e oo i ai sana faamatalaga e tusa ai ma lenei Tala Faaopoopo o Tupe. Masalo e amata mai se agaga faafetai i le Minisita o Galuega Tetele ma Felauaiga. Atonu o le a le toe tolaulauina manaoga o le itumalo ua uma ona ou faailoa i le taimi ua sola, ae na ona toe faamanatu i lau Afioga. E le tele lava se mea e manao ai si o matou itumalo, tau lava o sina auala e tau i le auala faalava ua uma ona tagisa pe a fa lou finagalo, ae faasoasoa i le tau faasoa o a tulaga ma se taimi e faatuanuu ai le faamoemoe.

Lau Afioga i le Fofoga Fetalai, e faafetaia foi le Afioga i le Minisita o Galuega Tetele pei ona molimauina e le tatou atunuu galuega ua faatino, ma o lo o matagofie, e pei o alatetele agai le malae vaalele. Faamalo faafetai ua matagofie lava le vaavaai i ia suiga ua oo i ai galuega. I sa'u faasoa lautele i le tulaga o lo o i ai, o lea foi ua uma ona faataatia le polokalama a le Afioga i le Minisita aua le toe fausia o le tatou auala i le cross island road faapea foi le alafaalava. Talu ai ona o le vaega lea i le auala faalava lea e oso atu i Tuanaimato, e pei o le auala lea o lo o fai ma auala alo a le mamalu o le atunuu. O le toatele foi o le mamalu o le atunuu e nonofo i Falealili faasolo mai ai i le itu lea, ua fai lava le auala lea ma auala e faafaigofie ai ona e le aega, e le pei o le cross island road e fai si a'e lea e ala ai ona oso atu tagata i le itu lea. Ae i le aso ananafi ina ua ou taunuu atu ae valaau mai se tina o lo o Faauluulu i ai si a tatou Matagaluega, ona e i ai le vaega o le auala lea o le alafaalava e i ai si tamai aualalapa masalo ua sosoo nei i le faaiuga o le tausaga na goto ai i ina le isi taavale, toetiiti lava faaletonu le soifua o tagata. Ae i le weekend lea na uma atu nei, sa faapena foi ona toe lavevea ai taavale ona o le tamai auala lea i se vaega o Aleisa e vaiti tele. So o se taimi e fepasiai ai se loli lau uta tetele ma se taavale

e sau mai le isi itu, ona sue lea o le mea e alo i ai le tamai taavale ae faaavanoa le vaega o le auala aua loli tetele, ia faapea foi le taavale o lo o lauina atu ai le suauu ae o lea auala o lo o faaoga tele e le mamalu o le atunuu. Ona ou tali lea i si faletua lea o lo o vaaia isi Matagaluega, o ia lea sa ia pueina le ata ma tuuina i luga o le api o foliga e faailoa ai lea vaega, ona ou tali lea ua lelei o le a ou tautala i ai nei i le aso. Ae tatalo atu i lau Afioga i le Minisita o Galuega, e tuuina atu i ou tafatafa a talafeagai ae faamuamua le faaleleia o le vaega lea ona faatoa oo ai lea o le faasologa i se taimi i le faia o le auala lea o le alafaalava e pei ona i ai le fuafuaga a le tatou Malo.

Ona ou oo mai lea i le Minisita o le tatou miliona. E lagona lava le agaga faafetai i le folasaga e pei ona i ai foi le aso ananafi. O se poloketi e ese le matagofie, e fiafia foi i ai si o matou itumalo. Aua pe itiiti se vaega o lo o tagofia, ae ua fiafia lava si ou itumalo, pe moavao, uilipaelo, suo, ae ua i ai se vaega ua latou maua i le faasoaga a le tatou Malo. E momoli atu le faafetai i lau Afioga i le Minisita e tusa ma le tuuavanoa e pei ona i ai. E pei foi ona tuuina atu i le aso ananafi, e ese le matagofie o le faasoaina o le miliona a lo matou itumalo. E tusa lava pe faatoa toe maua atu se tupe ia Novema, a o la e lava e tatala i taimi uma o lo o lava le faasoaga a le matou itumalo e pei ona taua e se tasi o Minisita i le aso ananafi.

Ae i ai se vaega e fia talosaga i lau Afioga i le Minisita mo Tina ma Tamaitai. O le matou nuu e i ai le pitonuu e tasi o Alamutu ua leva ona tatalo i le tatou Matagaluega po o a fa i lau Afioga ae ia faia se tofi Pulenuu o le matou pitonuu lea. Mo le taimi nei i le faafofoga mai a lou itumalo, e tasi le Pulenuu ae lua pitonuu. Lona uiga... ae tofi ma le fono a nuu o lo o faia ai. Lona uiga, e le faatasi le Pulenuu i le fono a le isi pitonuu seia vagana ua i ai se mea e finagalo i ai. Ae tatalo atu i lau Afioga, pe le ono tataua ona faia se tofi o le pitonuu lea o Alamutu ina ia faafaigofie ai ona faia fuafuaga o le matou itumalo faapea foi le matou afioaga.

Ona ou manatu lea e oo atu i le Vaega o tatou Turisi. Talu ai e silafia e le tatou Maota nei o le isi vaega taua lea o lo o i ai i lenei vaitaimi, o a tatou turisi e malaga mai i le atunuu, ae o lo o i ai nai vaega e ono tataua ona i ai ni mataaga, o ni talaaga o ni mea na tutupu i le tatou atunuu, ae paga lea, e limavaivai le itumalo. O le manatu lea e tuuina atu i lau Afioga i le Minisita o Turisi, pe le ono i ai sina vaega seleni e fausia ai ni nai mataaga i totonu o itumalo o lo o i ai ni talatuu a le tatou atunuu. E pei lava ona outou silafia mo le taimi nei ua fausia ma faaleleia le vai o lo o i Tufulele, e tele sona talaaga, o manatu foi pei ona silafia, e taua lena vai i talaaga o le tatou motu i Salafai e pei ona i ai le oo mai o lena tuliga ma liumaa ai i totonu o le matou nuu, e faapena ona tumau foi lena talaaga. Ae mo le silafia, o se talaaga matagofie i le tatou atunuu le vaega na tofufotu ai le ulugalii na ea ai le faapaupau o le tatou atunuu i totonu lava o le matou afioaga.

E tuuina atu ai le talosaga i lau Afioga i le Minisita o Turisi pe le ono faia ni nai mataaga faapea aua le talaaga o le tatou atunuu. Ma ou te iloa foi ua mou atu i le faafofoga a tupulaga faiae o le tatou atunuu mea na tutupu i lo tatou atunuu i ia tausaga ma fatia ua tuanai atu. O le tatalo atu lea i lau Afioga i le Minisita o le Turisi.

Ona ou oo mai lea i le tulaga i le Minisita o Taaloga. E pei lava ona silafia alo ma fanau o lo o avea ma avefua a le tatou atunuu i so o se taaloga i itu e fa o le lalolagi o lo o malaga atu i ai, e le faigofie i alo ma fanau le tulaga e pei ona i ai le latou taumafai. E pei ona silafia taaloga a le Pasefika na tuanai atu nei, sa tele se faaeaea i le tapenaga a alo ma fanau mo lo tatou atunuu. I le taaloga a le Pasefika i le fa tausaga ua tea a o tulai mai le faigamalo a le HRPP, lea sa i ai faamanuiaga. Na i ai faamanuiaga sa tuuina mai, sa tai \$2,000 a le pine auro, ae le i faitaulia le latou taumafai i le pine siliva ma le pine apamemea. E tatalo atu ai e fai lou leo e fai ma sui o lea vaega o taaloga, o a fa, o le a se tulaga o i ai le... ina ia fesoasoani mo le latou taumafai. E ese le matagofie o taumafaiga a alo ma fanau, ae le faigofie foi. Na pau lea o le vaega e mafai ai ona faatupuina le agaga fiafia o alo ma fanau e tausinio aua le faamoemoe ma le avefua a le tatou atunuu.

Ona manatu lea lau Afioga i le Fofoga Fetalai pei ona ou tautala atu i taimi ua sola, e le tagisa le itumalo, ae na o ni nai vaega e manatu e tuuina atu ona o le Tala Faaopoopo o le Tupe, e le o i ai se vaega tele o i ai e manatu ai e fai i ai se manatu tele, ae talia e le itumalo ma lenei sui usufono le Tala Faaopoopo o le Tupe.

Ia manuia tele lau Afioga i le Fofoga Fetalai ma le mamalu o le Palemene i ona itu uma. Ia mamalu mai le faamanuiaga a le Atua i sui usufono o Matagaluega pei ona tatou mafuta i lenei aso. Soifua ma ia manuia.

FOFOGA FETALAI: Malo saunoa i lau Afioga i le sui usufono mamalu o Sagaga 4, faafetai mo le tofa faaalua, o lea ua maua e le Maota aemaise foi o le tatou Malo aua le atinaeina o le itumalo ma le atunuu. Malo faafetai.

Ia, o le avanoa lenei o se tasi o sui usufono. Ia, e maitau atu e... Ia se i tulai mai Sagaga 1 lau Afioga i le sui usufono mamalu.

Afioga Hon LOAU SOLAMALEMALO KENETI SIO (Sagaga 1): E faafetai atu i lau Afioga i le Fofoga Fetalai mo le avanoa. E manatu foi o le a sosoo le fau ma le fau, ona o si ou uso a sui usufono foi po o Sagaga 4 o le usoga lava ma Sagaga 1 aua foi le paia o Aiga e Tolu ma Luatua ma lona Gautaala. E faapena foi lenei Itumalo ua faapena foi ona ou tulai mai ai.

A o le i faia se tala lau Afioga i le Fofoga Fetalai, e momoli atu le agaga faafetai mo le avanoa faaauro foi e fai ai foi se sao o lenei foi usugafono aua foi le Tala Faatatau o le Tupe e faauma ai galuega. E maitau atu foi i le Tala Faatatau Faaopoopo e le o se Tupe tele o lo o faapena ona talanoaina, ae o se avanoa foi e faapena ai ona momoli atu nai manaoga o lenei Itumalo.

Ae muamua lava ona faatalofa atu, e manatu foi o lea ua uma ona paelago paia, o sa ma faiga o le Maota lenei i tootoo foi ua faapena ona mavae atu i le taeao, ae faapena le aso ananafi. O paia sa ma faiga o le Maota i ona tulaga faalupe i le afio o lau Afioga i le Tamaitai Palemia ma lau Kapeneta ma lona talaga atoa i le afio foi o Afioga i Sui Minisita ma lenei foi talaga atoa i le afio atu o le Taitai o le Itu Agai, Sui Taitai ma nisi foi sui usufono o le Maota nei o le Palemene, aemaise le afio o lau Afioga i le Fofoga Fetalai i lenei taeao.

E faatalofa atu foi i le paia ma le mamalu lasilasi ua faapena ona aofaga potopoto i Ofisa Sili o Pulega o si o tatou Malo ua faapena ona tatou faatasi. Ae momoli le agaga faafetai i le maitau i lenei taeao mai le aso ananafi foi i felafolafogaiga i le fetuunaiga foi o muniao ma fefulisai faalaau mamafa le tofa ma le utaga, aua se lelei ma se manuia o si tatou atunuu e pei ona folasia.

Ou te tulai lava ma le ava tele lau Afioga i le Fofoga Fetalai i nai manatu foi e faatupu manatu aua foi nisi o lafoga foi ma tulaga e pei ona i ai le folasaga i le aso ananafi. E maitau foi ma le totoa e lilifa lava mataupu agai i le Ofisa o Aoga i fautuaga foi a o ni finagalo foi faaalii i le taua o lenei Ofisa i si o tatou atunuu o lo o faapena ona nafa ma le taumafaiga o aoaoga i totonu o si o tatou atunuu. E ogatasi foi la le futia aua o lea e pei e fesootai ma auala tekonolosi i lenei vaitau i le tatou matau, o lenei foi talutalufou ma le maitau, o foliga vaaia ia o le aotauina ua oo i ai le tomai ma lenei foi vaitau o aoaoga sa le masani ai tatou nei ua faapena ona ese mai vaitaimi foi sa tatou aoga ai tatou.

O le mea lena e faataua ai foi ia te au lou sui usufono i le tulaga o aoaoga ma le fesootaiga i auala faatekonolosi faaneionapo. O lea foi e maitau atu o lea lava e sootuli le Afioga i le Minisita o Aoga ma le Minisita o Tekonolosi ma Auala Faaneionapo. O se vaega ou te talitonu o lo o mafai ai ona la soosootauau i le la galuega ina ia fetuunai ai le taua o le Tekonolosi i le faaaogaina i totonu o aoaoga.

O faafitauli foi e pei ona sausaunoa nisi o sui usufono o le Maota, o faafitauli e ono tutupu ma o lo o faapena ona o le eseesega o tulaga foi e pei ona i ai lenei vaitau i le lalolagi, a o lea foi ua aafia atu ai ma si o tatou atunuu i Samoa nei. Na saunoa foi se tasi o Minisita ananafi ma taua ai lo'u igoa i se tala foi po o se lafoga na ou faia i totonu o le Maota. O le upu moni lava o le tala e faaataata-lafoga a o loo momoli ai se feau ina ia faapena ona faataua, lea na saunoa le Minisita o Galuega e faapea ua ou faapea atu "big cable small usage," ae o lena vaitau na oo atu le savali a le IT Experts, o alo foi ma tamafanau a si o tatou atunuu ua lava le aoaoina ma le tomai i mea tau IT e avatu se latou tala foi e faaosofia ai moegaluaga i le agaga o le taua o lau fasifuaiupu na fai i totonu ma latou momoli atu ai le feau taua tele ma e sao lelei le mea na ou tautala i ai. O le matau i lena taimi i le polokalame foi ma le poloketi tele na faia e le Malo, o lona faatauina ina ia faapena ona lava le fesootaiga, aemaise lava aoaoga ia faataua ia oooo le auaunaga i tua i mea o lo o faapena ona aotauina ai alo ma fanau. O lea foi la e toe avatu ai foi le tuualalo, aua foi ne i tetena i le Afioga i le Minisita o Fesootaiga ma Aualatelevave leaga o lea ou te maitau lava e pei e foliga mai e aafia loa lana Matagaluega ona tulai loa lea ma taumafai e fai se auala e tali mai ai e pei e foliga e aa, ae o lo o faapena ona taumafai atu ina ia maua le naunautaiga o le agaga e ala ai ona tatou faaaogaina le tekonolosi i totonu o aoaoga.

O lea foi e maitau o lo o faapena ona sausaunoa nisi o sui usufono i le tele o faafitauli e ono tulai mai. A o le agaga o le cable na ala ona faia e le tatou Malo e le gata e faaaogaina e le tatou atunuu a ia oo ai le auaunaga. O lea la e fai mai le au experts ia o IT e le i taitai ona uma ona tatou faaaogaina laina o lo o i totonu o le cable.

O le mea lea lau Afioga i le Minisita na ona tuutuualalo atu e silasila i ai lau Afioga. O lou naunautaiga foi i le taimi sa matou tulai mai ai, ia free le internet e faaoga e aooga, tatou Iunivesite, aepeitai ane ua le tau lau o le faamoemoe i lea itu. E ui i lea na ona avatu faafautuaga i lau Afioga i le Minisita, toe silasila ifo i ai, e le i taitai ona uma ona tatou faaogaina le aoga o le tatou cable lea e pei ona faataatia mai i lalo o le alititai o le sami aua le faaogaina tatau i totonu o tatou aoga. Ou te masalo ana ua oo i ai sau suesuega i lea tulaga ma fai i ai se fuafuaga, ou te talitonu o le a foia uma ai faafitauli ia o lo o faapena ona talanoa atu ai ma avatu foi le fautuaga a le Afioga i le agai i luma o tatou aooga.

Afioga Hon Toelupe Maoiautele Poumulinuku Onesemo: Lau Afioga i le Fofoga Fetalai...

Afioga Hon LOAU SOLAMALEMALO KENETI SIO: E le o se agaga leaga la lea ou te fautua atu ai, ae toe silasila i ai lau Afioga i lea tulaga ae ia faaoga ma le agaga tatau na ala ai ona faia e le tatou Malo le cable...

FOFOGA FETALAI: Ia, malie lau Afioga i le sui usufono mamalu ona o lea ua fia tulai mai le Afioga i le Minisita o Fesootaiga, leaga o lea ua taua le Matagaluega. Tulai mai lau Afioga i le Minisita.

Afioga Hon Toelupe Maoiautele Poumulinuku Onesemo: Faafetai i lau Afioga i le Fofoga Fetalai mo le avanoa. E leai foi se agaga e faalavelave i le saunoaga a le sui usufono mamalu le Afioga ia Loau o le foi sa avea ma Minisita o le Kapeneta talu ai i le vaitau a o tau faufau mea ia.

E moni lelei le saunoaga. Na pau lava lea o si mea laitiiti manu foi o maua avanoa ma faamanino, sa saunoa ai foi i ai le tele o sui usufono. Atonu a manino lava le amataga, e taumafai foi e talatala nisi o vaega.

E sao lelei le saunoaga i le tulaga o le tatou cable, e talu lava ona pale mai le faigamalo, sa fofola atu lava le tulaga faiga faavae alualumamao a lenei foi itu o le malu, itu o le Maota. Ae atonu e le o maua lelei e le Afioga i le sui mamalu tulaga sa talatala atu ai.

O le tulaga sa i ai le faiga faavae sa i ai, na aumai le cable ona ave lea i tua i le private sector. E pei e faapena le operate ina o le tatou gateway, ia ona le matala loa lea o avanoa mo le lautele o le atunuu. Lea la e saunoa i ai i le tulaga lena o le tele o le cable ae le o mauavanoa uma pisinisi leaga foi o lea ua ave i private sector le... operate faa-private sector le gateway, e le mafai ona tatou ave le soifua ma le ola o le tatou pisinisi gateway, ave i tua i le Private Sector. O matafaioi na a le Malo e auala atu ai ana fesoasoani talafeagai i lea taimi i lea taimi i pisinisi ina ia ola uma le atunuu. E pei o le agaga leaga o lea e saunoa e le i oo i ai se suesuega e pei e faapena.

O lenei faigamalo, faufau malie. O lena itu, ua 40 tausaga a o lea e taumafai atu i le 1 ma le afa tausaga. Na ona faamalie atu ai ne i te i ua faapea mai e le i oo i ai se tapenaga a lenei itu. E faapena, matou te faaoololomaa ma talosaga atu, aumai se avanoa a o faifaimalie. Ma le agaga faaaloalo.

FOFOGA FETALAI: Malo saunoa i lau Afioga i le Minisita. Se i tulai mai lau Afioga i le sui usufono mamalu e faaauau le saunoaga o lea ua manino saunoaga a le Minista.

Afioga Hon LOAU SOLAMALEMALO KENETI SIO: Faafetai atu i lau Afioga i le Fofoga Fetalai, e manino atoatoa lau Afioga i le Minisita, ae pei ona ou fai atu toe silasila totoa i ai i lea vaega aua le agai luma, ona e ui o la ua ave i tua faapisinisi a o la e lava e tele le avanoa e mafai ai pe a faapea e mafai ona toe fetuunai muniao aua le faafoeina o le tatou cable...

Afioga Hon Toelupe Maoiautele Poumulinuku Onesemo: Lau Afioga faamolemole...

FOFOGA FETALAI: Ia se i tulai mai lau Afioga i le Minisita, malie lau Afioga i le sui usufono mamalu. E i ai se isi mea?

Afioga Hon Toelupe Maoiautele Poumulinuku Onesemo: O si mea laitiiti lava ona o lea e pei e le o talia. E ave loa i tua i le private sector, e totogi le tupe, e ave loa i tua, faaoga, totogi le tupe. A o le agaga i le tuu i le Malo, a fia faaoga a o la e vaivai le tala i le seleni ina ia ola, e mafai ona faaoga fua mo se tausaga. Ia o le eseeseaga lea o le ave i tua i le private sector o si a tatou tamai maketi laitiiti ma nai tatou pisinisi o lo o tauatia. E pei e faapena le eseeseaga o le ave i tua ma le tuu i totonu ma le agaga faaaloalo.

FOFOGA FETALAI: E talitonu o lea ua manino lea vaega, faafetai mo le faamanatu, a o le la ua i le Minisita ma le Matagaluega le faafoeina mo le agai i luma .

Afioga Hon LOAU SOLAMALEMALO KENETI SIO: Masalo o le a ma le fetalai ma le Afioga i le Minisita i lea tulaga e pei ona ou fai atu e lua lava laina la e faaoga e le Digicel le isi ma le Vodafone, a o lo o tele lava le avanoa e mafai ona toe silasila i ai lau Afioga i le Minisita, ina ia faaoga aotelega aua le tatou cable, ae sao oe i le tulaga lea e pei ona e saunoa i ai. O le faafitauli lena o lo o faapena foi ona faufau mai le amataga i sou lagona, e faapena ona aoga i a tatou aoga ma foia ai le faafitauli o lo o i ai nei.

Faafetai atu i le Afioga i le Minisita o Galuega ua ese foi le maitau i lenei vaiata i le tatou auala ma tulaga faapena. Na ona ou toe faafesili atu lava i lau Afioga, o toe fai ni konekarate foi ia faamama auala lau Afioga, aua o lea ua i ai polokalame ia o lo o faapena ona faaogaina ai le tatou miliona. A faapea ua le o toe iai ni konekarate, o le a le mea e le faamatu ai tua i afioaga e faamama e latou o latou tafaala ma tafafale ina ia mautinoa o lo o faapena ona taatia mai i se tulaga lelei foi ma matagofie le siosiomaga aua foi malo fegasoloai, aemaise lava foi o turisi mai fafo. E maitau foi i lenei vaiata e 2 i le 3 masina faatoa vaai lea ua faamama lea itu ma lea itu, ae a faapea e faamatu i tua i nuu, na ona fautua atu i lau Afioga pe a talafeagai ai ae faaoga i ai ia tatou seleni ia. Ou te iloa foi o le tele o afioaga e tofua lava ma le...

FOFOGA FETALAI: Malie le sui usufono mamalu se i tuu atu le avanoa i le Afioga i le Minisita ona o lea ua taua lona suafa ma le Matagaluega. Lau Afioga i le Minisita.

Tofa Hon Olo Fiti Afoa Vaai: Faafetai tele lava i lau Afioga Fofoga Fetalai mo le avanoa, faafetai foi i lau Afioga i le sui usufono o lea ua ia lagaina le mataupu taua lava lea. E moni lelei le saunoaga a lau Afioga i le tulaga o le faamamaina po o moagavao se i tulou le Maota ma le faafogafoga a le atunuu. O lea foi sa alu lau asiasiga i le vaiaso na tea nei, e molimaui nisi o vaega po o ua atoa le tai 3 masina e le i toe moa se vao e oo i alavai. Lea la ua ou mauaina lelei konekarate sa tuuina atu ai vaega ia. Ma o le a oo foi i ai se faiga o se faaiuga i ai leaga o le mea, o lea e alu ai tupe a le atunuu i le totogiina o konekarate ia, a o lea e pei e foliga mai e le o faamaoni.

Ae o le tulaga lena i lau afioga i le sui usufono mamalu, faafetai tele. Sa i ai le fuafuaga e amata nei i le amataga o le tausaga nei le faamatuuina atu o vaega ia i itumalo. Peitai, o lea sa pei se... pei ua pisi lava le Matagaluega o Tina ma Tamaitai i le tatou miliona. Ma ou te talitonu ua lape ai le vaega lea o le faamautu mai o ni faiga faavae e faaalu ai le galuega lea e faamatuu atu ai moagavao ma tulaga faapena i Fono Faavae. O lea la ua... o le faaiuga o Iulai i le tausaga lena i lau Afioga ua... o i ina o le a faagatania ai konekarate ia e tuu atu ai moagavao i totonu o afioaga... nuu ma afioaga. Seiavagana vaivao foi ia e tuu lava i konekarate ia vaega na ona o loo iai alavai ma mea faapena. O le faatuai o le le maua o tatou masini e faatino ai. Lea la ua... faafetai ua alu atu lau asiasiga toetiiti lava leai se aiga e leai se moavao se i tulou. E faapena ona silasila nuu ma afioaga e aveifo ni tupe o poloketi e faatau ai masini na ona amata ai loa lea ona faagasolo le tatou... le faamatuuina atu o galuega i totonu o afioaga ma nuu e maua ai le seleni foi a nuu i le tulaga lena.

E mafua ona ou... e ese le taua o le mataupu lea i le auala lea a tatou o le Westcoast Road i le agai i le malaevaalele, ou te iloa lena tou te molimaui i luga o le taligalu, o le va o le auala ma le taligalu, lena ua sosolo atu lava le fue e oo i nai taata la e i ai i o. Ae a ou fai atu i ai i nai nuu na, o le a le mea tou te le o ai e fai le galuega o le faamatagofie e outou... totonu a o le tou nuu. Ae sau le tali, o lea e faatali mai le LTA e o atu e se i nai taata e fa la e i ai i i.

O le tasi lena o vaega lea ua tilotilo ai le Pulega a le LTA ina ia faamatuu atu mea na. E oo foi la, se i tulou le Maota, o isi vaega ua matua faalapisu uma. Ae ona o le tulaga faapea e responsible ai le Pulega a le LTA, ae manaia loa le lafo atu i o i nuu ma alaafaga ona faamama lava lea ma responsible ai alii ma faipule. O galuega a le aualuma po o le malosi o le nuu latou te faatinoina lea vaega.

Ae faafetai i lau Afioga mo le laga o lea mataupu taua, o le faaiuga o Iulai i le tausaga nei o le a amata ai loa ona faamatuu atu vaega na pe afai ua uma ona tapena tatou taiala, aemaise ai foi o masini e faaavao i itumalo. Ma le faaaloalo.

FOFOGA FETALAI: Malo. Faafetai i lau Afioga le Minisita. E talitonu o lea ua manino lea tulaga. Lau Afioga i le sui usufono mamalu faaauau le saunoaga.

Afioga Hon LOAU SOLAMALEMALO KENETI SIO: Faafetai. Faafetai foi le tali mai a le Afioga i le Minisita e tusa ai foi ma le... O le vaaiga lautele i le aotelega o le tatou atunuu aua e le fuatasi i se itumalo. Ae faafetai pe afai o le tulaga lea ina ia faapena ona faamatagofie pea si o tatou atunuu aua foi tatou malo fegasoloai.

A o i ai pea i lau Afioga i le Minisita o Galueg, o le tulaga foi lea i le tatou CSO foi lea mo fesoasoani mo tatou tagata limavaivai aemaise le tosoga o mea o poumoli. Po o le a se tulaga o i ai i lenei taimi lau Afioga ona o lea e maitau e tasi lea o faafitauli aemaise nai aiga o lo o mamao i totonu mai auala o lo o faapena ona taatitia ai laina a le EPC. Ia ua ta fiu e tali tali fesili ma faapena foi ona... Ona o le tulaga lena e oo mai i le ofisa ae avatu le tau ia e matua le gafatia. Tasi le poumoli, lua poumoli, pe tolu foi a o lea ou te iloa la e i ai le tatou polokalame lena e fesoasoani i nai o tatou tagata limavaivai. Po o le a foi se tulaga ua faataatia ai i lenei taimi lau afioga i le Minisita ae manaia ona faalauiloa faalauaitele ina ia malamalama nai o tatou tagata. E itiiti a se iloa o lo o faapena ona i ai i o tatou tagata aua le faatinoina o lea foi auaunaga lelei ma le matagofie foi e fesoasoani i nai o tatou tagata limavaivai. O le isi au fesili i lau Afioga e maitau i lenei vaitau o le tala lava lea ua tatou faalogo i ai ua faapena ona taugata le soifuaga. E le na ma le laina e le na o tatou foi le atunuu o faapena ona aafia i lea tulaga. E tele faafitauli ma tulaga ua oo i ai le tamaoaiga o le lalolagi. Ia lea la e pei e foliga mai o i lea e amo ai foi e tatou le taugata o oloa ua oo mai ona o le taugata o le feaveaiga i vaa a lalo. Ae o lea ou te talitonu sa i ai le tatou PFL. O lea foi ou te maua tala o lea lava e maua dividends a e sa faapena ona shareholders ai. Ae ou te le iloa po o le a se tulaga o le tatou Malo i lenei taimi po o maua ai se tatou tupe...

FOFOGA FETALAI: Toe lua minute o le sui usufono.

Afioga Hon LOAU SOLAMALEMALO KENETI SIO: Ae o i tonu lea ou te talitonu o lo o taugata ai le soifuaga ona o le felauaiga o oloa nei i vaa a lalo. Ae se i silasila ifo i ai lau Afioga i e o lo o faapena ona fitoitonu ma lea tulaga i mea tau vaa po o tataua ona fai se tatou fuafuaga i lea tulaga.

Tofa Hon Olo Fiti Afoa Vaai: Lau afioga pe maua se avanoa.

FOFOGA FETALAI: Malie lau Afioga i le sui usufono mamalu se i tuu atu le avanoa ona o lea ua taua le Matagaluega a le Minisita o Galuega Tetele. Lau afioga le Minisita.

Tofa Hon Olo Fiti Afoa Vaai: Ou te toe faafetai atu foi i le Afioga i le sui usufono mamalu i le laga foi o le mataupu nei. Ona talu ai o le PFL lea o lo o i le matou aiga potopoto. Ia lau afioga i le Fofoga Fetalai, ia o le... sa i ai foi i lau tilotilo ona o le tulaga foi lea atonu o se faiga lea sa fai foi e le tatou faigamalo talu ai i le fesoootaiga lea o le PFL Samoa ma le PFL Group, lea e fai le latou joint venture lea i... e tau fesoasoani lea i le fetuunaiga o freights. Ina

ia aumai i lalo freights, e aumai i lalo ma le tau o soifuaga. Peitai, o le taimi nei e oo mai i le taimi nei e pei lava ou te tau maua o le 2015 sa faatuina ai le vaega lea. E faasao mai au e le Taitai o le Itu Agai pe afai o ou sese. Ae pei o le 2015 na amata mai ai. O le agai mai lava lene e oo mai i le taimi nei lau afioga i le Fofoga Fetalai, ua ou le iloa po o fea ua agai i ai se dividend e pei ona saunoa i ai le afioga i le sui usufono mamalu i lea foi atinae. Ona a fua atu, o lea ua sefulu ma ono tupu tausaga e le i oo mai ia te au se tala o le tupe, e le i oo mai ia te au ni accounts, e faamaonia e le Afioga i le Minisita o le MPE po o ua i ai foi se dividends. Ou te iloa lava e le o i ai foi se mea.

Lau Afioga i le sui usufono mamalu, ma o le a tilotilo ai foi i lea tulaga lenei Vaega ma le faigamalo foi i se faiga e fai i ai pe afai ua leai lava se tupe o maua mai i lea vaega ae faamalolo loa lene vaega ae fai se isi faiga fou ina ia tatou saili ai le tulaga lea o le faapau mai i lalo o tau o freights ina ia pau i lalo le tau o le soifuaga. Ae ou te faamaonia lau afioga le sui usufono mamalu, ia ou te le o mautinoa ua ta fiu foi e tulituli pe i ai se faamanuiaga a le tatou atunuu o maua mai i le faigapaaga lea. E oo mai i le taimi nei e le o maua mai se tala sao. Lea ua 10 ma ono tupu tausaga. Ae o le a taumafai atu i ai, ona toe logo atu lea o le tatou Palemene i se isi faiga e fai ai. Ma le faaloalo.

FOFOGA FETALAI: Malo faafetai. Ia se i tulai mai leaga lea ua taua le suafa o le Taitai o le Itu Agai i le fesili a le Minisita.

Susuga Hon Tuilaepa Fatialofa Auelua Sailele Malielegaoi: Malo lau Afioga i le Fofoga Fetalai. E taga ona ou tu atu e tali?

FOFOGA FETALAI: O lea ua taua le faamaoniga. Na o le faamaoniga ona uma ai loa lea.

Susuga Hon Tuilaepa Fatialofa Auelua Sailele Malielegaoi: Faafetai. O le 2015, sa faatautui ai le tatou PFL ua gau. Ae o le taimi tonu lene lea sa Sui Palemia ai le Afioga ia Lauofo, a o ia foi la sa avea ma Minisita o mea tau Vaa. E malamalama tele la Lauofo i le mataupu lea. Ona aumai lea e le afioga ia Lauofo le mataupu i totonu o le Kapeneta. Po o le a se finagalo o le Kapeneta ua i ai lana fautuaga o lea ua faatautui le tatou PFL ma e ua ofo mai ai se kamupani vaa mai Siamani. O le fautuaga la a le afioga ia Lauofo na aumai i totonu o le Kapeneta, o se fautuaga taua tele lea. O le alii faufautua i mea tau vaa a le afioga ia Tupuola lea tonu e agai mai ai lau fesili. O Tupuola e tele lona tomai i mea tau vaa. Ona ave loa lea o le tatou offer ona talia lea e malo uma o le Pasefika. O latou uma ia e ana le fuavaa lea ona ave ai lea e tatou o le vaa. E leai se tatou vaa ae own uma a e tatou uafu ma facilities uma i totonu o Samoa, Toga, Fiti faapea foi ma Niu Sila. O se faaiuga taua tele lea mo Samoa. O lea la na aumai ai lea o le talosaga a le isi kamupani vaa lea la e taua e le alii Minisita o le PFL Group. O le kamupani lea, e sili atu i le 6 a latou vaa e feoai i le Pasefika, lea la ua fai mea... fai le tatou faigapaaga ave i ai a latou sea ae umia ai e Samoa le tele o sea. O lea la na totogi uma ai aitalafu i tupe maua mai

i gaioga ia sa fai. Ua uma uma ona clean up uma aitalafu sa i ai ma ua le toe i ai nei se aitalafu. O le ma toe talanoaga la ma Tupuola...

FOFOGA FETALAI: Malo. Ua maua atu le faamalamalamaga.

Susuga Hon Tuilaepa Fatialofa Auelua Sailele Malielegaoi: O lea o le a agai atu i le faaiuga. Fai mai Tupuola e \$5 miliona le tatou dividend la e fuafua e aumai i le tausaga 2021.

O lau fautuaga la i le afioga i le Minisita, e sili ona e talanoa ia Tupuola. Ua leva na tataua ona e malamalama i le mataupu tau vaa a o lea e tau mai nei o le matua e le malamalama lava i se mea. Ia lau Afioga i le Fofoga Fetalai, o le faamalamalamaga lea ma le fesoasoani i le Minisita o mea tau vaa e matua le iloa lava se mea i mea tau vaa.

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai. E tulai atu ona e... E puupuu lava.

FOFOGA FETALAI: E le i lava a ma totoe le tali a le Taitai o le Itu Agai. Lea e ave ai ma lou suafa ma le lelei o mea sa e faia.

Tofa Hon Laufo Fonotoe Nuafesili Pierre Laufo: Leaga lea ua tau lou i goa. Tuu atu ai se minute se tasi. Leaga e faaopoopo atu a e puupuu e le umi....

FOFOGA FETALAI: Ou te manumanu i le taimi lea e faasolo le tatou galuega...

Tofa Hon Laufo Fonotoe Nuafesili Pierre Laufo: Leaga lea ua toe tulai mai le Minisita.

FOFOGA FETALAI: Leaga o lena o le a e agai i le Minisita... Leai...

Tofa Hon Laufo Fonotoe Nuafesili Pierre Laufo: Leai. Ou te faaopoopo i le faamalamalamaga lea...

FOFOGA FETALAI: Leai. E faamalulu atu i lau Afioga le Sui Taitai. Na ala ona ou tuua le avanoa i le Taitai o le Itu Agai leaga o la e sa taua e le Minisita. A o lau Afioga, e le i taua. O le mea lea ia malie maia...

Tofa Hon Olo Fiti Afoa Vaai: Ia, lau Afioga i le Fofoga Fetalai, e le i oo lava le faamalamalamaaga i le mea lea e tuliloa atu. Aisea ua leai ai ni accounts, aisea ua le aumai ai se dividend? O le ma talanoaga ma... O lea sa talanoa la le Afioga i le Taitai o le Itu Agai ma Tupuola. Ae na ma talanoa ma Koki, o le tala la lea na fai mai, e le i maua lava se dividend e aumai ona la e faapea e ave accounts i le tatou Chief Auditor. O le mea la lea e tupu, na ou suea le Chief Auditor e aumai accounts ia se i aumai le \$5 miliona lea e talanoa mai ai le Taitai o le Itu Agai. Ia ae saunoa mai le Chief Auditor e leai ni accounts ua

avatua, leitioa la le maua se dividend o laua ma Lauofo. O lea la ua ou maua lelei o le toalua la lea na faia le mea lea. O lea la ou te fesili atu ia oulua, o fea ua ave i ai dividends o le PFL?

Tofa Hon Lauofo Fonotoe Nuafesili Pierre Lauofo: Faafeta lava, o lea ua tau lou igoa o lea la ua maua lou avanoa, faafetai lava. O le faaopoopoga la o le vaega lea, malie lau Afioga leaga o lea ua tau mai lou igoa i o e le Minisita.

FOFOGA FETALAI: Faigata tele se outou se, ia se i fai po o le a le mea lena e te tau saunoa ai.

Tofa Hon Lauofo Fonotoe Nuafesili Pierre Lauofo: Ia, e le... e sao uma a saunoaga a le Taitai o le Itu Agai. Ioe. E leai a se mea o faaletonu leai foi se mea o sese, \$5 miliona, Ioe, a lea e onosai. La e ua saunoa mai le Afioga ia Tupuola, se taimi, e pau a la le mea e fai o le faatalitali ma onosai.

O le mafuaaga lea na mafua ai ona fai le mea lea i le amataga o le vaitau lena ua tau le omai ni vaa, ua amata ona sioki oloa i totonu o kamupani ma faleoloa. Ua oi mai le atunuu ma talosaga mai, lea na mafua ai loa ona fai le fuafuaga lea ma le faiga lelei lea. O divi uma a la a atunuu ia sa i ai na foai uma mai lava mo Samoa lea la na fai ai loa ma le tatou faamoemoe lea. E le na ma le laina na ou alu ou aisi. Na ou aisi i atunuu ia aumai ai ma latou divi fai ai la le faamoemoe lea o tatou....

FOFOGA FETALAI: Faafetai, o lea ua maua atu le finagalo o le Sui Taitai.

Tofa Hon Lauofo Fonotoe Nuafesili Pierre Lauofo: O le vaitaimi lena maualalo le tau o freight, maualalo le tau o le soifuaga, taugofie le tau o oloa, mea uma lava sa fiafia ma olioli Samoa.

Tofa Hon Olo Fiti Afoa Vaai: Lau Afioga i le Fofoga Fetalai....

Tofa Hon Lauofo Fonotoe Nuafesili Pierre Lauofo: A o le a le mea lea ua iai? Fai sau fuafuaga i ai i le taugata o le soifuaga lea ua i ai.

Tofa Hon Olo Fiti Afoa Vaai: Ia o lea o le a faasao...

FOFOGA FETALAI: O le ala foi lena lea e taumafai atu ai le Nofoa.

Tofa Hon Olo Fiti Afoa Vaai: Na ala ona mafua ona fai le fesootaiga ma le faigapaaga lea...

FOFOGA FETALAI: Se i tulai mai....

Tofa Hon Olo Fiti Afoa Vaai: Na ala ona mafua, lea ua manino lava, e toe ta'u a e ia le faaletonu na i ai. Na ala ona fai le faigapaaga lea ona ua leai ni oloa, a lea ua manino mai lana saunoaga?

Susuga Hon Tuilaepa Fatialofa Auelua Sailele Malielegaoi: Lau Afioaga i le Fofoga Fetalai pe mafai a ona ou tu atu o le mea e fia faasao.

Tofa Hon Olo Fiti Afoa Vaai: A o lea la ou te fesili atu i le aualii ia e toalua po o fea o ave i ai tupe o le sefulu tausaga lea na outou faia ai le mea lea ae tasi lav le tausaga lea ou te galue atu ai.

FOFOGA FETALAI: Ia, ua manatu foi le Nofoa...

Susuga Hon Tuilaepa Fatialofa Auelua Sailele Malielegaoi: O se mea e fia faasao lau Afioaga...

Tofa Hon Olo Fiti Afoa Vaai: O le account a ai lea e tuu ai tupe ia a le PFL...

FOFOGA FETALAI: Ia, o lea ua maua atu.

Tofa Hon Olo Fiti Afoa Vaai: O lea ua ou fesili sao atu a ia oulua.

Susuga Hon Tuilaepa Fatialofa Auelua Sailele Malielegaoi: O le mea e fia faasao lau Afioaga, o le taimi tonu lea na faaletonu ai le PFL lea sa ola i luga o oloa foi ia a le kamupani foi lea sa fai uaea a le Yazaki. Ua i ai la le faaiuga a le Yazaki o le a tapuni, lea la na tapuni, a o i lea sa ola ai le kamupani vaa. Ona aumai loa lea o le latou faaiuga o le a tapuni, e pei la o le mea lea na tupu ai loa le faalavelave lea o le a ave le vaa e faasalalau ona ua tau. Ia e pei la o le mea lene leaga na amata mai lava ananafi e tau mai le aso, na o le pepelo a le mea lea sa fai e le Minisita lea, ia na ona faaiu atu faapena.

FOFOGA FETALAI: E manatu foi lau Afioaga i le Taitai o le Itu Agai, e le tatau foi ona tatou tuuaia ia lafoga i totonu o le Palemene. E le lelei foi i le faafogafoga a le atunuu aemaise foi o le tatou Faigamalo.

Tofa Hon Olo Fiti Afoa Vaai: Lau Afioaga faamolemole ou te tatalo atu leaga ua mamafa le saunoaga a le Taitai o le Itu Agai faapea ou te pepelo. A lea ua avatu le faamaoniga? E 10 tausaga e leai se tupe maua mai le PFL. Ou talanoa atu foi ananafi na mafua ona faaletonu le faiga o le tatou SNBH ua leai se infrastructure a le Malo, ua faatau e Tuilaepa, sell, sell out.

FOFOGA FETALAI: Ia...

Tofa Hon Olo Fiti Afoa Vaai: Ia, e sao uma a la mea ia ou te talanoa atu ai.

Susuga Hon Tuilaepa Fatialofa Auelua Sailele Malielegaoi: Na o le talanoa a i le infrastructure ae le malamalama po o le a le mea la e talanoa ai... O le mea la lene, ia faamagalalo.

FOFOGA FETALAI: Ua manatu lau Afioga i le Taitai o le Itu Agai, faafetai. Ua lava foi lea. Ia e faapea lava uiga o le Maota ae o le mea pito sili ona taua o lea lava e fetufaai faatamalii. E pau a o lea e fautua atu foi le Nofoa i a tatou lafoga ia ave pea le tatou faaaloalo i le tatou Faigamalo o tulai mai nei i afioga i Minisita. Sa faapena foi i le taimi i lena itu, o le agaga lena o le Nofoa ia tatou maua pea le feavatai ma maua pea le tatou faapalepalea'i.

Ia malie lau Afioga i le sui usufono mamalu ua maea lou taimi, e leai se isi avanoa mo lau afioga o lea ua maea. Ae taua foi le mea na e folasia o lea foi ua fetufaai ai le Maota, ia o lea foi ua manino.

Ia, lau Afioga.

Afioga Hon LOAU SOLAMALEMALO KENETI SIO: Faafetai lau Afioga i le Fofoga Fetalai. Ua sao ai le muagagana foi lenei, ua tafafao tane ae talanoa ai le aualuma, e a au e ona le mataupu ae misa ai le aualii ia. E ui o lea ia e leai o nai motugaafa lena itu o le vai, lau afioga i le alii Minisita. E ala ona ou fesili ona o lea e maua le tala ma ua faamautinoa o le freight lea e ala ai ona taugata foi ia oloa e aumai i totonu. O lea foi la ua ou fesili ai i le tatou PFL po o a ni fuafuaga foi o tilotilo i ai le Faigamalo mo le agai i luma.

Ia o le fesili lava foi e tasi e tusa ai foi ma le tatou vaalele. Lau Afioga i le Fofoga Fetalai ia o lea foi ua matau i lenei vaitau i le taugata o pasese i le feiloaiga... O au na ou alu i le vaiaso na tea atu nei i Niu Sila, e tagiuu a le loto i le taugata o le pasese. Pe ana i ai se tatou vaalele atonu e mafai ona toe tilotilo. E leai o lena e i ina le uta ma le tofa i le paia o le Kapeneta aemaise lau Afioga i le Minisita e fitoitonu i vaalele, se i silasila i lea tulaga pe le ua tatau ma onomea i lenei vaitau ona toe aumai se tatou vaalele e fesoasoani i le taugata o pasese o lo o faapena ona i ai nei.

FOFOGA FETALAI: Malie lau Afioga i le sui usufono mamalu o lea ua faauma atu le saunoaga ona e manumanu i le tatou taimi o lo o faagasolo le tatou Tulafono.

Afioga Hon LOAU SOLAMALEMALO KENETI SIO: Ia faafetai e usitaia foi lau Afioga. Na ou manatu a lau Afioga, o lea ou te vaai atu ua... ae ui o lea o le a usitaia le mea e finagalo i ai lau Afioga.

FOFOGA FETALAI: Faafetai.

Afioga Hon LOAU SOLAMALEMALO KENETI SIO: Afe ane i si ou Itumalo i le latou tapuaiga i tulatoa ma tulatofia, le paia ma le mamalu o le Itumalo i ona tulaga faalupe. Malo le tapuai, malo le fai tatalo foi i le afaigaluega tofifi aua le tapuaiga i le Fonousu a si o tatou atunuu aemaise le Palemene.

Manuia lau Afioga i le Fofoga Fetalai, manuia lena itu, ola foi le leo ma le agaga faaaloalo.

FOFOGA FETALAI: Malo faafetai saunoa i lau Afioga, faafetai foi mo finagalo faaalua ia atonu o lea foi ua malamalamagia ai nisi o mataupu pei ona fefaasoaai ai foi sui usufono mamalu o le Maota ma le afioga i le Minisita. Ia malo, faafetai.

Ia, o le avanoa leni o se tasi o sui usufono. O lea ua matau atu pei ua leai se tasi e fia saunoa. Ia a o le i tuu atu le avanoa i le Taitai o le Itu Agai, ia ona sosoo loa lea ma le tatou Taitaifono ia ona faatoa faasolo ai lea o le tatou Kapeneta. Ae ou te talitonu o lea ua leai se isi sui usufono e toe fia saunoa. E a lau afioga i le... Oi ia, paga lea le sui usufono o Satupaitea ia o lea foi o le a...

Lau Afioga i le sui usufono mamalu o Satupaitea, lou avanoa leni.

Afioga Hon LAUTAFI FIO SELAFI PURCELL (Satupaitea): Faafetai i lau Afioga mo le avanoa o leni sui usufono, atonu o nai minute lea e totoe o le a taumafai atu ai se leo o Satupaitea ia ona faaauau lea a taeao.

E muamua ona faatulou ma faatalofa i le paia o le malu i leni aso i le usugafono a le tatou Palemene. Le afio o lau Afioga i le Fofoga Fetalai, afio lau Afioga i le Tamaitai Palemia, Sui Palemia, le mamalu o le Kapeneta, afifio o Minisita Lagolago i lena itu. O'o mai leni itu le afio o le Taitai ma le Sui Taitai o le Itu Agai ia faapea alii ma tamaitai sui usufono o leni itu o lo o agaia le Malo.

E faatalofa atu i le mamalu o Ofisa Sili o Pulega o Matagaluega. Ua uma atu lena tausaga 2023, ia alo mai i leni tausaga tatou galulue faatasi. Faamanuia atu le tausaga fou i le tatou Maota aua tatou galuega, faatasi mai le Atua i le 2024. Le tatou galuega o lo o tatou alo atu i ai, ia faatasi mai le agaga o le Atua e maua ai le manuia aua se manuia o le tatou atunuu.

E faatalofa atu foi i le tapuaiga a Samoa mai lava i mauga tetele seia paia maugaiti, taitai o ekalesia i fatafaitaulaga e fia ia faamalo le tatalo, faamalo le tapuai ma nonomanu aua se manuia o le tatou atunuu. Faafetai i la outou pitolaau.

Faafetai i si ou Itumalo o Satupaitea, malo i la outou taputapu mai. O outou lava e maua ai le malosi o le sui usufono e avatu ai o tatou manatu i totonu o le fonu leni e faaauau ai ma oo atu ai so outou finagalo i totonu o le Palemene. E faatalofa atu i si ou Tina ia Anasoa lea ua aulia lou 89 tausaga lea lava e te taputapu mai, o lena foi e te matamata i le TV i le taimi leni i le Fono. Faafetai i lau tatalo, e le mafai ona misi i le loomatua leni fonotaga nei, taputapu mai ma aumai le tuualalo. E faapena foi si ou Tina matua i Satufia ia Foti lea ua 96 tausaga, se i vaai i ai o tagata ia o lo o maua ai lou malosi faapea Tama ma Tina matutua o si ou Itumalo. O fatafaitaulaga e fia i totonu o Satupaitea, malo i la outou tatalo, malo i la outou taputapu mai a o alofaiva la outou sui usufono e faaleo se manatu. Tapuai mai se i fai se tala a le tou sui usufono e uiga i le Tala o le Tupe lea ua opea i le Maota nei.

I le aotelega lau Afioga e lagolagoina e le Itumalo leni le Tala o le Tupe i ona vaega uma lava. Atonu e i ai se taimi e talanoa ai i mea taitasi ia ona toe laga lea o sou manatu, a o le aotelega, faamalo i lau Afioga i le Minisita o Tupe, malo le taumafai i lou tulai mai faapena foi le Matagaluega. O outou o lo o outou galulue ma aumai pepa nei i luma o le tatou maota i leni aso.

O le faafetai lava ia e faamuamua i le mea e tatau ona faamuamua i ai. E faamuamua atu ia ni manaoga sa ou talosaga ai. Le Afioga i le Minisita e masani lava ou te tu a ma ou finau atu i le faaletonu o le fesoootaiga o telefoni i le vaiaa'i lea ou te nofo, e le o lou Itumalo a o i le mea lea ou te nofo ai i Aleisa. Ia, ua ta fiu foi le mea e talosaga ae faafetai o lea ua faatu le pou a le Vodafone, e tu tonu a i luma o lou fale. O isi foi taimi ua faatiga mata le tilotilo atu i lenei pou tele a o le measili o lea ua mafai ona ou nofo a i totonu o lou fale ma fai lau telefoni. A o le mea sa iai ou te fealuai solo i fafo e sue se mea e maua ai ia se coverage o le telefoni.

O le mea lea faafetai i lau afioga i le Minisita ma le Matagaluega i sa outou lagolago foi na ave i le kamupani. Ua fiafia si a matou vaiaai ua le toe feoi solo e sue ni mea e ola ai a latou telefoni, la ua fai mai lava i le fale. A faafesootai atu foi ia Matagaluega, aemaise le Matagaluega lenei ia ma isi Matagaluega ia te au e vili atu a maua loa. Ae o le mea sa iai e fiu e vilivili atu e le maua au, ia o le faafetai lena i lau Afioga.

A o ou iai pea i i e lagolago lava e le sui usufono lenei le faaleleia o aoaoga i mea nei o tekonoosi. E leai lava se isi mea tatou te o agai i ai, o le lalolagi lenei o le lalolagi o mea tau tekonoosi, pe tatou te mananao ai pe leai. This is the way the world is going and we have to be with it. E tatou te le o ai loa i fuafuaga lelei ia aoga lenei auaunaga, ia le tatou olaga la a alu i luma ia ona tatou faaletonu lea. Faaaoga tatau, faaaoga sa'o, e tatou te faaaogaina loa i nisi auala ia ona foliga loa lea o se mea sese, o se auaunaga e le tatau ona fai ae a tapena lelei ia aoga le auaunaga i le mea lea tatou te mananao e aoga i ai e pei la o tatou aoaoga, pei o tatou falemai. O tulaga uma faapena, ona tatou maua lea o le penefiti i le agai i luma. O le tupulaga lea e pei ona saunoa se isi o le tupulaga lea e i ai nei o se tupulaga e matautia le atamamai lea la a agai i luma leaga lea ua i ai tulaga nei e fesoasoani i ai latou, this is a technical ma le mea lea o le digital world, lea ua ola ai a tatou fanau, soifua ai ni o outou alo ma ni au fanau lea ua ola ai. Tatou te le tutusa tatou malamalama ma tamaiti nei. Po o le a lava le mea e faaletonu o lau telefoni e tuu atu lava i lou grandson e poto e fai ola ia uma. O le uiga lena o le tala a o lea faatoa amata ona faatino le auaunaga lenei.

O le mea lea lau afioga i le Minisita aua e te lotovaivai e faapea ua le o aoga isi mea pe e le o faaaogaina isi mea. Ia tilotilo lau afioga ma le Matagaluega e fai se auala i mea e tatou te mafaia ina ia aoga i le mea e gata ai le aoga, like we wanted it to be, what is the purpose tatou te mananao i ai ia popoto a tatou fanau ia popoto alo ma fanau po o fea lava le nuu aua le faapea nao iinei Apia. Ia e tutusa a i Vaimoso ma Vaega i Satupaitea ia le aoga la e i ai, le service e ave i ai se i tulou a le taua o le itumalo o le sui usufono mamalu.

Ia ona ou oo mai lea i le Minisita o le Siosiomaga, o i foi sa ave foi i ai se talosaga a lenei foi itumalo e talosaga lava i se taligalu. Ia o lea na oo atu le Matagaluega ae le i faia le kerisimasi ma matou savavali i le mea lea e ala ai na ou pisapisa mai ma ou vigaviga atu i le afioga i le Minisita o Galuega aemaise le Minisita o le Siosiomaga lea la ua tali mai foi, lea o le a tau faagasolo atu ia aiaiga o le faagasologa, po o lea faatoa tau amata e o atu inisinia po o taeao ea, e tilotilo ma silasila po o lea le ituaiga taligalu e lelei pe fia foi lona tau. Ia o le agaga o le faafetai lau Afioga i le Minisita.

O le mea lenei o le suiga o le tau, ia atonu o lena tatou te iloa uma lava ailoga e i ai se alaafaga o se isi o tatou e le o matauina le tele o le suiga la ua i ai aemaise lava le siisii o le tai. O le mea sa mamao i tai le sami o lea ua fati mai a i tua o maota ma laoa o aiga lea na silasila i ai le Matagaluega. Ia, o le luitau a lena tatou te feagai a ma le luitau lena from now on this is the challenge i le lalolagi atoa. Ae ou te faataua e a'u i tatou i nei i Samoa ma nuu laiti ona e si'o e le sami. O le siisii lava o le sami, o lona uiga o le nuu atoa lava lea o le a alu agai lalo. O le mea lea faafetai o lea ou te vaavaai atu e \$450,000 ea le tupe o le paketi lea e faamoemoe mo mea nei o taligalu. Ia ae tailo i ai i le faasoaa lau Afioga i le Minisita a o lea ou te vaai atu lea e i ai le \$15 miliona lea e aumai i le Paketi aua le mea lea o le Climate Change. Ia e tatalo atu a le lava ai se taligalu lelei mo lota itumalo pe a amata ia o lea e i ai le faasoasoaina o le tupe lea i le meaalofa a Niu Sila.

E tatalo atu foi e manaia lava le vaevae lelei o le tupe lea po o a vaega o le Climate Change lea o le a faasoaa i ai, o taligalu, o alavai o auala laupapa ona faasaga sao lava lea o talosaga a le sui usufono ia i le vaegatupe lea aua e leai se aoga a o la ua uma ua leai se tupe o totoe o lea vaegatupe. Na o se tuualalo po o se fautuaga e faafaigofie ai foi i a outou afioga aua e le uma ai i i talosaga i le mea nei, i mea nei o taligalu ma le aafiaga o le suiga o le tau. Faafetai foi i le usugafono a le tatou Malo na alu i le afioga i le Minisita ma i latou foi na malaga pei a o le COP 27, 28 lea sa faaali le tatou tete. Ma o le faiga a lenei o fonotaga nei, e pisa pisa a ae oo loa i le taimi e fai ai faaiuga maumaututu ia na te i a lea ua... a le matapoto la le usugafono mai nuu laiti nei, e fai lava e latou le faaiuga, e nuu tetele ae le aafia tatou.

E moni lava o lea e... ae pei e le i i ai se avanoa tatou te finau ai ae le i faia le faaiuga i le Resolution, ia ae faamalo atu o lea lava na sau i faasalalauaga le tete o Samoa i le faaiuga la ua fai, aua e fiafia a latou e fai a o tatou e sili atu le aafia. O le faafetai tele lea i lau Afioga.

O le isi vaega ou te fia oo i ai lea foi sa taua e nisi o sui usufono i le taumafai lava o le tatou atunuu ia mama, keep Samoa clean, keep Samoa clean. Ou te le iloa po o le a le isi ituaiga gagana e tuu atu i tua i tatou... ae a vaai mai foi la nuu i tua e pei e solomua i totonu o le taulaga le le mama, ia ma o taimi a lea o aso fiafia pe tolu a vaiaso e leai ni lapisi e ave. O le isi mea e pule lava le taavale lapisi ia pe alu atu ae po o le a foi le aso e alu atu ai. A o le mea ua avatu le lapisi ae ua te'a le aso ua alu ai le loli, o le faiga o mea faapenei e tataua lava ona tasi le aso pe lua aso. O aso lava na e tataua lava e fuafua mai foi e aiga le taimi e aumai ai a latou lapisi i luma. Aua a aumai tuu lua aso ae le ave ia lena tou te silafia ia o taifau ma mea o pusi e o atu ua saei ia ma mataga ai le taulaga i le taimi lena. Sa lagona lava le faanoanoa. O tatou lea e uunai mai turisi o le taimi lena o le tele o turisi i inei, ae paga lea ou te le iloa po o lea mea na tupu e faapena foi i Savaii, i Salelologa ua leai ni tagata e o e tae le lapisi, a o lea e loma le tatou fonotaga tele le fonotaga tele lea e tilotilo mai i inei i le mea lea o le a omai i ai. A vaai mai la o lea e fau atu lapisi, ia e lagona ai foi le faanoanoa faapea ai e le o lava tapena le tatou atunuu...

FOFOGA FETALAI: Ou te vaelupeina le saunoaga a le sui usufono o lo o saunoa ona o lea ua oo mai i le tatou taimi manava o lenei aso. Ia o aga masani lava e maua pea avanoa pe a tatou toe taliu mai i le Aso Fono e sosoo ai mo saunoaga a sui usufono mamalu.

Ua faamalo le usufono i lenei aso, malo foi le faatoatoa ma le onosai. E faamalo ma toe faafetai atu i sui usufono mamalu sa sausaunoa i lenei aso fono faafetai mo le tauavagameaina o le tatou galuega. E faafetai atu foi i le tatou Maota mo le taumafaiga o le tatou galuega i lenei aso. Ia o a ni aga ma ni tu ma ni amioga foi i lenei aso o a foi ni saunoaga ua le tautamalii i le faagasologa o tatou taualumaga ia taoto ia i inei. Ia tatou maua pea le faamagalo ma le loto fefaamagaloa'i, talosia i le alofa o le Atua i le aso a taeao.

E faamanatu atu a tatou laei uliuli mo Aso Tofi taitasi e tusa o le tatou taulamua foi i le tetee atu i sauaga i tina ma tamaitai ma fanau i le aso a taeao. Pe a o tatou tatala ia faamanuia le Atua i toega o lenei aso, faafetai Samoa i lau tapuaiga ia i ai pea le agalelei o le Atua i si o tatou atunuu.

Ae tatou te le i tolopo ou te talosaga atu i le sui usufono mo Vaisigano 1 e saunia se tatalo e faaiu ai le tatou Fonotaga.

Na tolopo Taulumaga a le Fono Aoaofaitulafono i le itula e 1:04 i le aoauli seia aulia le Aso Tofi, 25 o Ianuari 2024 i le itula e 9:30 i le taeao.